

HEBREO IMÁCI MO CUEGABE

(Daa bimaci jiaífodo mameina Judúuai)

La Carta a los Hebreos

Juzíñamui ie Jitodo ja comínimo úrite

¹ Jaiái ninomo cai judúuai jaiáidigimamo Juzíñamui úrite. Ua, ie uai llórainido diga icaiño, diga jiaífodo jóoide uáillaído úrite.

² Mei íadi ja birui íirairuillaído Juzíñamui ie Jitodo caimo úrite. Bie Jitó uaido Juzíñamui jaiái bie éniena naa úcuairi finode. Iemo naga raa íeiena náamatallena Juzíñamui íena mamede.

³ Afe Jitó ie Moomo ite ebíredena jino cíotatimie. Daje llezica afémie jino náiraimo cíotaga; ua daje Juzíñamui izóidimie. Nana finoca ráaniaina afémie dájena jaináitano ie ñue rírede uáillaído nágarui ñue jaícina finócana uite. Bímie, cruzmo dama ie die tótajado cai fiénidifuiái ñue múiñua mei, caifo monamo ite Juzíñamui nabezi dibénemo ráinazaide, dinómona nahí illáimaillena.

Juzíñamui Jitó Juzíñamui abi imáciai baimo fígomie

⁴ Afémie afe jamánomo ríiredinomo jáillamona, nana Juzíñamui abi imáciai baimo fígomiena jaide.

⁵ Juzíñamui ie abi imácimona dáamie jaca “Cue jitódio” daiñede. Ua, “Cue Jitódio, ja birui illáimana o jóoneiticue” jaca daje izói íaioina daiñede. Mei íadi ie Jitó Jesucrístona daií daide. Daje izói ie abi imácimona dáamiena “O moona

íticue” daiññede. Dáanomo “Cue jitóitio” daiññede. Mei íadi Jesuna daií daide.

⁶ Ua Juzíñamui ie izoide daade Jitona bie éniemo comuítajano daide:

Mai, nana Juzíñamui abi imaci, bie cue jitona jacíruioicana ñue omoi ióbitari.

⁷ Mei íadi abi imácina Juzíñamui daide:

Bimaci cue abi canórainina íllamona, íaioina ocuífiredicue. Iemona jairifo raire náidacailla izói, bimaci cue ocuícana raire jetáfirediaioi.

Afe izói nana cue canófirede cue abi imaci jacírede boode iraici izói, íaioina ocuífiredicue, — daide.

⁸ Mei jíáifodo ie Jitona daide:

Juzíñamui o íllamona, o illáimana illirui jaca ninomo zíñona íite.

Ñue comécina jaícínainafuedo jaca illáimaifireitio.

⁹ Ua, comécina jaícínainafuena izíruitio, mei íadi fiénidifuiamo éoicana eróidio.

Iemona Juzíñamui, ua o Juzíñamui, jae ona ióbitade.

Nana Juzíñamui uaina jíéruite o nabáñiaí cáimadua baimo, cáimatagao, — daide.

¹⁰ Jíáinomo ie Jitona Juzíñamui daide:

O Ocuíraimadio.

Naga ráaniaí o táinia mei, bie énie finódio.

Nana monamo ite naga úcuai o ónoído finócano.

¹¹ Afe énie naa úcuairi niné táinocaitiaioi, mei íadi o jaca zíñona íitio.

Aféniaí jácara iníroillai zabilla izói zábitiaioi.

¹² Iemo inícuero dócoiano oni jóonia izói, oni eneno íaioina jóoneitio.

Iemona iniroi jiaíroina abimo jita izói, bínie naa
ucúduairi méidoficaitiaíoi.

Mei íadi o jaca méidoñelloza, dinó nímieitio.

Omo itifue jaca ziiñona íite.

¹³ ¿Ñie mei ie abi ímiemo Juziñamui llogámie:

O fairíconi o anamo cue anáfenotalle llezica mai
benó cue nabézimo illaíma nabai izói
ráinazaíbi?

Daií dainámiena iñede. Dama ie Jitó Jesuna daií
daíde.

¹⁴ Nana afe Juziñamui abi imaci Juziñamui ocuica
canófirede jóriaíai. Ua Juziñamui orécaíaioi,
afémiedo jíllotino ñue rairuíllena.

2

*Cristo caimo lluaíbiga jíllona uaimo ñue
úíñoredicai*

¹ Ie jira Juziñamui Jitó, Jesucristo daií
naga illaíma baímo jáidimiena íllamona, nana
Juziñamuimona cai cacana uailai jeire cai olle
iere jitáirede; omoi jefóniai ñue jinéoiri. Aféuaimo
ñue omoi cacáreiri, oni nibéfodo fiénidifueмо cai
baíiñeillena.

² Mei Juziñamui jaíai ie abi imácido llogáuai jaca
oni caitánide. Naga aféuaina jeire oñédino naa
cacáfinidinori raire iere duere finócaíaioi. Mei
afe fiénidifue finuamona Juziñamui íaíoi mo jaícina
ibana ote.

³ Mei íadi birui aféuai baímo jamánomo ñue riírede
uaina cacádinodicai. Ie jira bie Crístonona cai
cacana uáíllaina jeire cai óñenia, ¿níífuedo jaícina
iba uáfueмона jíllotícaí? jíllonidicai! Afe baímo ñue
riírede uai nano fueñe Ocuíraíma Jesucristo caimo

llogáuai. Ie mei ie dái nana cacá dínodo aféu ai jae cai uafue dai ñllena llotátaga.

⁴ Afe íai oi dái na uaimo onótate raado Juziñamui ñue uai nabáitate. Iemo jíai jacírede raado, aillo cíora ñina raa diga afémie ñue uai nabáitate, íai oi dái nauaimo ñue cai ñnollena. Afe llezica Juziñamui ie jíta ñafue izói, ie Ñuera Joreño ñúefuai finolle ríino, illa dígamierie íai oimo fecade, daje izói caimo.

Jesucristo Juziñamui Jitó íadi afémie cai illa izói, fia cómena íficaide

⁵ Cai úrifirena ñuera úreitiruillaido ñímie illáimaillena, Juziñamui ie abi imácina: “Illá ñina jáiti omoí” dai ññede.

⁶ Mei jíai fodo comínina illáimaitaacade. Jai ai Juziñamui Cuegáuaimo David Juziñamuina daide: ¡Ñi naga come Juziñamui dibénedo jamáimíina! ¿Ñibái mei íai oimo comécidido? ¿Ñibái mei íai oi jíto íaimo járitaitio?

⁷ Mei uáfue na due jiza o abi imaci jofófenemo comínina comúitatio.

Illáima ebírenano naa ñúefue diga íai oimo nitáido.

⁸ Naga raa íai oi anamo o itátatio.

Dai ñ naga raa íima anamo itábicaillamona, jae minica ie anamo itábicaññeden a ññede. Mei íadi ja birui íima dibénedo naga raana náamatañega. Afe izó ññedeza; afémie nahí náamañede.

⁹ Mei íadi jíai fodo birui Jesuna cai onónamona íemo comécidícaí. Afémie nana íanori due jiza Juziñamui abi imaci jofófemo jónegamie. Aféruido afe Jesús nano cai jíai ñona, tilla onóillena facade; mei afe llezica nana comíni fiénidí fue íco ñina

Juziñamui zóofegamieza. Ie mei tiide meine abido cáanamona jamánomoidimiena jaide. Afe mei afémie, illaima izói, ñúefuena nitácamie, jae ebire finócamie, mei nauí ie tíllaruimo iere duere ie zefuillamona. Juziñamui cairi dúecaillano, nana comini niné táinocaitañellena cai ícoinia Jesuna daií zefuítate.

¹⁰ Juziñamui daií ie Jitó duere finoille caimare íemo jóbide. Ie jira Juziñamui íaioina jíllotaite ifódimie duere zefuillafuedo nana cai jíllonafuena ñue fuitade. Mei jii, naga raa Juziñamui íeiena ie ínuamona ja birui itíaiói. Afémie nana comínimona aillo jitótiai jíllacade ie caimare ebírenanomo dáanomo íaioi dúcizaillena.

¹¹ Mei Juziñamui dibénemo oni jóonetimie Jesús, nana Juziñamui dibénemo oni jóonegamaci diga daje Juziñamuina móorediaioi. Iemona, cai baimo jamánomoidimie íadi, Jesús “Cue ámatiaidíomoi” daií dáinana meáiruiñede.

¹² Afémie Juziñamuina daide:

O mámeçi cue ámatiaimo jino llóiticue.

Nana omo gairídino cígiri rocana ñúefue omo nitaiticue.

¹³ Jiáinomo Cuegáuaimo daide:

Cue Juziñamuidío. Omo ínoiticue.

Ie mei jiáinomo daide:

Be, benó iticue, Juziñamui cuemo iga naa úruiairi.

¹⁴ Onódiomoiza, nana cai jae cómena comuítagacai. Daií cai íllamona, daje izói Jesús dama cómena comuíbicaide. (Ua, fia come izói jéiciga.) Afe mei come abí íemo íllamona, ie tíllado cai títaite Taifena ríinitade.

15 Jaiáimona nana tille jágiedo Taifemo rairuícamacidicai. Mei íadi Jesús jae cai jacíruiñeillena nane ñue cai finode. Ja ráiruiñeganona afémie daí cai ñue orede, nana nauí cai caana llezica tíllena jacíruiticai íadi.

16 Mei uáfodo onóigaza: Jesús ie bíllado Juzíñamui abi imácina cánuaibiñedeza, mei íadi cómena íficaillano nana Abrahámona comuídigimana cánuaibite naa jíaie Juzíñamuimo íinotínoiri.

17 Afémie cai cánuaibilemone ie ámatiai nana íaíoi illa izói afémie íficaillana iere jítaíredeza, mei dúecaífirede nahí comínimona Juzíñamuimo comínido úritillaímana jáideza. Ua íinofirega Juzíñamuimo úriráímana jáiacade, afe daí ie tíllado comínimo ite fiénidífuiaí oni muiñóllena.

18 Mei Jesucristo íaífue fiéni facátafuiaíimona duere zefuide, aféfuemo baiñede íadi; íemona ja birui fiéni Taife facátagamacina cánua ríino Crístomo íteza, ja caína ñue canórede.

3

Jesús Moisés báimo jamánomoidimie

¹ Ie jira, cue ñue ámatiai, Juzíñamui uáidogamací díbenemo jáináidíomóiza, Jesumo izire comeci omói facari; ua cai jeire oga ñúefue lluaíbitagamíemo ñue comeci omói facari. Iemo nane Juzíñamui díbenemo caído ñue úritimíemo, mai íemo comeci omói facari.

² Bie Jesús íena daí mamédímie ocuica uaina jaca nágaruillaí íinofirede; ua, jaiáidímie Moisés

nana íemo llogáuaina jeire ófirena izói, afe izói bímie nana íemo ocuica uaina jeire ófirede.

³⁻⁴ Jae onódiomoiza naga jofo come niga; dama abina niñédeza. Mei íadi naga ráaniai finódimie Juzíñamui. Iemo daje izói ja onódiomoiza, naga jofo niraima afe nigaco baimo ñúemieza. Afémiemo jamánomo ñúefue jónerede. Ie izói afe bie Jesús Moisés baimo ñúefuena nitáregamie, mei naga raa afémie comuítagaza; íemo jái daje izói Juzíñamuimo cai jainánana Jesús comuítateza.

⁵ Ua, afe Moisés nana Juzíñamui íemo llogáuai, Juzíñamui dibénemo táijiacadimie izói, aféuaina ñue jaícina Juzíñamui eneno nizeca Israel náiraimo llotátate. Afe daí afémie ie méifodo bite llófuellífuomo uai nabáitate.

⁶ Mei íadi Cristo, jofona náamataga Jitó izói, nana ie anamo itínona ñue jaícina ocúoide. (Afe daí Cristo Moisés báifene ímienaza onódicai, mei naga jitó, jofo ero táijiraima baimo itímenaza.) Iemona Cristo dáinana, cai ínuafue ñue riire itífuedo are illa ícoimo jeire cai oíadi, Juzíñamui comínidicai. Afe llezica afémiemo caimare cai úiñuana jitáirede.

Juzíñamui comini começi caimare uái illafue

⁷ Ie jira Juzíñamui Ñuera Joreño jaii Cuegáuaido daide:

Birui Juzíñamui daináuai omoi cacana llezica omoi coméciai riiretañeno iri.

⁸ Jaii énie zaféredinodo Israel comini facátaruimo afémaci íaioi começi riire ínuano Juzíñamuina uáitatiaoi.

Jí, afe izói omoi iñeno iri, daide.

⁹ Iemo nane Juzíñamui daide:

Aféruillaído jaiái omoi uzútiaí Judíuai cuemo
 íñoñoeno fiéni facátafuedo cuena facátatiaíoi.
 Cuarenta diga fimónado nana íaíoi mo cue
 finócafuiaina ciódiaíoi íadí, cuemo fiéni
 comécidiaíoi.

10 Ie jira afe bigíma cuena rícaítade.

Afémacido daídicue: “Íaíoi comeci cuemo figo
 jaináíñenamona, cue lloga io onóñoeno oni
 nibéfodo jáidinona itíaíoi.”

11 Iemona áferi icírillano rírede uaido daídicue:
 “Jaca cue lloga caimare comécina uái
 ocózinaillana óñeitiaíoi,” daídicue.

12 Amatíai, daje izói figóñede, ñúefuena íáiruiga
 íñoñede comécimona mai abí omoi rairuiri, afe
 izói omoi íñeilla. Mei afe izóidimie cai caade
 Juzíñamuimona oni eneno jica íeza.

13 Mei íadí nágaruillaído, Juzíñamui ómoína
 nai uáidua llezica, Juzíñamui dibénemo ñue ríire
 jainairi. Iemo daní ómoimona ñue lletari. Daíí
 ñue omoi llóiri, fiénidífue ie abi jífuiafuedo buna
 ómoimona dáamie comécina ríreiñellena.

14 Mei nanóidemona caimo ite izire ínogafue,
 ríire fáicanocaiñoeno uáfuena cai onóíadi, jae Cristo
 dibénemo jaináidinodícai. Aféfuemo rairuíñoeno ñue
 omoi jíruiri.

15 Juzíñamui Cuegáuai daíí daíde:

Birui Juzíñamui daínáuaina omoi cacana llezica,
 jaiái Israel Juzíñamuina uáitajaruimo comeci
 ríirena izói, omoi comeci ríiretaneño iri.

16 ¿Bu mei afe Juzíñamui uai cacáдино íadí, nane
 dáanommo íena uáitate? Mei nana Egíptomona Moisés
 bairócamaci Juzíñamuina uáitate.

17 ¿Mei ñímaci cuarenta ðiga fimona Juzíñamuina icíritate? Mei nana afe Juzíñamui uai íñoñeno fienu finódino; ñí afémaci ícuruai énie zaféredinomo fiénocaiga.

18 ¿Ñí náiraina riírede uaido Juzíñamui daide: “Jaca cue lloga caimare comécina uái ocózinaillinomo dúciñetiomi?” Mei nana afe ie uaina cacádinona íadi aféuaina jeire oñédinona daí daide.

19 Daí íaioina dáinana íaioi íñoñenado jofocáimanomo dúcinidiaoi. Ua daí ñúenomo íaioi dúciñenana onódicai.

4

1 Ja birui Juzíñamui uafue caimo lloga caimare comécina uái ocózinaillana cai olle uai caimo ite. Aféuai nai caimo illa llezica mai ómoimona dáamie aféuai comécimo óneillena daítadifuemona mai abí omoi rairuri.

2 Mei uafue cai bie ñúefuena llogámacidicai. Ua afe jaii Egiptomona bairócano ñúefuena llóina izói ñúefuena llogámacidicai. Mei íadi íaioi cacana uai figo íaioina canóñede; mei íñoñediaoiiza fia táinona cacádiaoiiza.

3-4 Mei íadi Juzíñamui lloga caimare comécina uái ocózinaillinomo nahí jofojáidinodicai, mei ie uaina ñue cai ínofirenado. Birui Jesumo cai ínuamona, caimare comeci jacíruiñenafue dibénemo jónegacai. Jira ocózinairanomo táijíñeno cai illa izói, jae caimare uái iticai. Ie mei uire Juzíñamui illánomo ñue afémie ðiga caimare uái íiticai. Jaii íñoñedinona Juzíñamui daide:

Iaiomo cue rícaillano ñue riírede uaido daidícue,
“Afe cue lloga caimare comécina uái

ocózinaillinomo jaca dúciñeitiaíoi,” daídícue. Daíí Juzíñamui íaíoi na daíde. Mei íadí ua íaíoi caimare illífue Juzíñamui are uícomo mamécaza; mei jae are énie ie comuítajarumona, nana Juzíñamui ie finócafuaí, naa caimare caí illífuaíari, jae fuitádeza. Mei Juzíñamui jíáinomo ie Cuegáuaimo afe ie ocózinaillaruido úrite; daíde:

Juzíñamui seis dígarui táijide; ie táijina mei siete iruimo nana ie finócafuaíaimona caimare uái ocózinaide.

⁵ Afe mei jíáiruideo ie Cuegáuaimo Juzíñamui daíde: Cue lloga caimare comécina uái ocózinaillinomo dúciñeitiaíoi.

⁶ Iemo ñúefuena nanoide cacáдино ñinoñenamona afénomo jofo íaíoi jáinina méifomo, áfeo nai jíáimaci jáillena túide.

⁷ Ie jira Juzíñamui díga fimona jailla mei, David roránicuaído comini uáiduano meine jíáie billirui íaíoimo llote. Afécuaímo, due jiza íllamona cue lloga izói, Juzíñamui daíde:

Birui Juzíñamui daináuaina cacádiomoi za omoi comécina ríretañoeno iri, daíde.

⁸ Mei íadí Josué afe jáiáidinona nahí caimare come come jíacíruiñenanomo uíñede. Ie jira díga fimona illa mei Juzíñamui meine abído comini caimare illíruina úrite.

⁹ Iemona afe nahí caimare come comécina uái ocózinaillafue nai ite, Juzíñamuimo jáináidimacina daní íaíoiena maiñóllena. Afe ñue caimare caí illífue ocózinaillaruido caí ocózinailla izoide.

¹⁰ Mei naga afe Juzíñamuimona oga caimare illífuena maiñódimie, dama ie jílluille naa ie nícidogano fáicanocaillano, caimare uái ite.

Ua Juzíñamui naga ráaniai ie fínua fuilla mei, ocózinaillano caimare uái ite. Afémie uái illa izói caimare uái iticai.

¹¹ Ie jira afe caimare cai illífuenta mai ñue omoi maiñori. Mai benómona daíi omoi ífireiri, ómoimona buna jáiairagima bífuenta íaioi íñoñenado íaifuemmo baiílla izói omoi báiiñeillena.

¹² Nana Juzíñamui lloga uai, jaca íocire cáadimie izoide. Afe uai jaca ninomo riíredeza, buna oni caitánide uai. Aféuai comini ífóciaimo déifirede; ua íaioi comécina zuitáfiredé. Mei jii, jáire jicaica lloéfaido abi ñeta iere jofó ícurumo raire dúcizailla izói, afe izói Juzíñamui uai nana cai comeci ífuiái onótate. Uáfuenta cai comeci facáduana naa cai comeci jítailafuiári fídiano ñue uáfodo jaícina jino caimo onótate.

¹³ Nana Juzíñamui finócafuiái íemona oni retáidonide. Ua, daa Juzíñamui cióñenamiena iñede. Nana cai comécillafuiái cai finócafuiái diga, uáfori cai nahí Jicánoraima ui anamo ite.

Jesús Juzíñamui dibénemo caído ñue úrifiredillaíma

¹⁴ Jae Juzíñamui Jitó, Jesús, mona úillie illano iere caifófenemo jaillano, Juzíñamui illánomo dúcide. Dúcillano Juzíñamuimo dibénemo caído ñue raire úriraimana jaide; ua afémie caído úrifiredillaímana jónega. Afe bie úriraima caimo íllaza, mai nana afémiemo cai comécilli; afémiedo cai ínogafuiái fáicanocaiñeno jaícina riire ñue íemo cai ínoilli.

¹⁵ Afe caído Juzíñamuimo úrifiredillaíma nana cai abi riíдолle riino iñénana onode. Ua afe cai riino iñénamona cai féiraifirenana afémie onode. Ie onónamona caimo dúcaifiredé; mei afémie cai

izoide cómena íficaillamona, nana fienu facátafuiai na
caí cacana izói cacade íadi afe fiénidífuiamo
baííñede. Iemona Juzíñamui dínena jáiredicai.

¹⁶ Ie jira Juzíñamui illámana illánomo caí úrizaili;
mai omoi jacíruiño afe caído úrifiredillaímado
Juzíñamuimo raíre úrifireiri. Daí íemo úiredicai
caina ie dúcaillano caí fienu finócafuiái iba caímo
óñeillena; daje izói afémie caí jítáilliruido caí
canóllena, afémiemo úiredicai.

5

¹ Naga come dibéfodo Juzíñamuimo úritillaíma
comínimona nizeda oga. Uano Juzíñamuimo
comínido úrillaena mamécamié. Daje izói afémie
comini dibéfodo Juzíñamui íóbitalle ráfuiái
finófireillena mamécamié. Íaíoi Juzíñamuimo fia
iga ráaniaí afémie izájite. Daje izói íaíoi fiénidífue
iba otátañelle fia fállena fecaca tóica rílleniaí afémie
Juzíñamuimo izájite.

² Afémie ríinide cómena íllamona, íaíoi illa izói
abina onóñedimacina fíaicana comeci járitañenado
caímare fíraizitaite. Daje izói oni níbéfomo
baíídinona comeci járitaño llétaite.

³ Mei afe nizécamié caí izói ríinidímié. Iemona
dama ie íaífuiái muiñolle tóica rille jíáímaci fécajilla
izói, afémie jíái fécajirede. Ua nana comini dibéfodo
izáíbilla izói, dama íeíena afémie izáíbirede.

⁴ Afe iere ñuera Juzíñamuimo úriráimana
íllena, buna dama ie comeci jítaina izói ínide;
dama Juzíñamui jóonegamie daí írena. Afémie
caímare jacíruiagamie. Jáíáidíruimo daí Juzíñamui

Aarona uáidote. Uáiduano, Juzíñamui íena nizada úritillaimana jóonete.

⁵ Afe izói Jesucristo Juzíñamuimo comínido úriraimana ílena raire dama uícoficaiñede. Mei íadi Juzíñamui daí úritillaimana ie jóoniacana llezica íena daide:

Cue jítóio; ja birui illáimana o jóoneiticue, daide.

⁶ Ie mei daí dainámiena Juzíñamui jiáinomo nane daide:

Jaca ninomo Juzíñamuimo comini dibéfodo úriraimadio. Ua jaiái ninomo Juzíñamuimo úriraima Melquisedec izói jaca ninomo Juzíñamuimo comini dibéfodo ziiñona úriraimana ítio.

Aquíe izói Juzíñamui ie Jitó Jesuna daide.

⁷ Cristo cai come izói bie éniédo jáicaillarullaído, izire éecana Juzíñamuimo comeci facade. Iemo dáaruido Juzíñamuimo izire jicade. Afémie daí íena jíllotaredimie comécido úrite; daide: “Bie cue tíiacanafuemoná maí cue jíllota” daide. Iemo Moo Juzíñamui anamo afémie ñue itábicaillamona comécido Juzíñamuimo ie jícajana Juzíñamui cacade.

⁸ Daí Jesucristo Juzíñamui Jitó íadi, ie duere zefuillafuiaído ocuilla uai anamo itábicaillana fibide.

⁹ Afemona afémie daí nana cai jílloilifue ñue fuitállena jamánomo jaícina fibítagamiena jaide. Ie jira nana íemo ínotimaci dibénemo Jesús ziiñona Jíllotaraimana jaide. Ua ziiñona jíllonafue tainédimiena jaide.

¹⁰ Mei jira Melquisedec izóidimie Juzíñamuimo comini dibéfodo ziiño úrifireitimiena, Jesús jae Juzíñamui mamécamie.

Cai ñnogafue meine abido cai jáanolle iere jacírede

11 Bífuiado aillo úriacadicue, mei íadi iere cacáacañediomoi. Iemona nai figo baitañedino izói itíomoi. Daií omoi íllamona, bífuiái ómoimo jino cue llole iere féirede.

12 Naui nano Crístomo omoi ñnuaruimona jae diga fimona jaide. Iemona jae oni jáímacimo omoi llófuerizaille iere jitáirede. Mei jáíifodo ja birui meine abido Juzíñamui llogáuai tainéinafuiaina ómoimo jáíima llófuelle jitáirede. Nai monoi jirode úrue izói meine abido úruetaidíomoi; nai figo baitañedino izói itíomoi. Ua llíciaina nai rínide izóidinona abido jáidíomoi.

13 Mei jii, naga monoi jirófiredino, móonaiñena llezica nai dúetiru. Daje izói naga Juzíñamui anamo ñue jaícina caina móonaitade llófueinafue dibénemo baitañedimie nai úrue izoide. Mei afémaci nai móonaiñeno úruiai izói baitañediaioiza.

14 Mei jáíifodo dama móonaite éicomini llíciaina rírena. Afe izói juárede llófueinafue ñue onona dama comécina ñue jéedimacimo dúide; mei afémaci aillo facáfírenamona ñúefue fiénidífue baimo ñue onónana fibídiaioiza.

6

1 Ie jira afe nánoide Cristo dibéfodo llogáfuiái ómoimo llúana ja mozíñocadicue, jáíie cómfue ómoimo jino cue llóllena. Omóimo cue llole bie cómfue, Juzíñamui llogáuailaido ómoína ñue jaícina móonaitaite. Aféfuiái mai jeire cai olli. Nano uícodo lloga ñúefue jillácina meine abido diga icaiño ómoína llófueñeiticue. Afe nanóidífuiái bie izói daide: “Omóina jílotañeite omoi nícidogafuiái

fáicanocaillano ñúefuena méidori. Méiduanu, mai Juzíñamuimo omoi ínnori,” daide.

² Iemo afe nanóidifuiái bántizaafuedo úrite. Iemo dáanomo onoi cómemo bítafuedo úrite. Daje izói come tílle mei, afe tíidinomona meine abido cáaillifue llote. Afe emódomo, írairuimo Juzíñamui nana comínimo jícanolle mei ziiñona duere finótallifuedo úrite.

³ Nana bie nanoide llogáfuiáiina meine abido llófueñeiticue. Mei íadi, Juzíñamui comeci jitaina izói, afémie cue canólledo, ñue móonaitadifuiáiina omoi llófueiticue.

⁴⁻⁶ Daí birui ómoimo llófueacadícueza, mei nanóidifuiáiina uáitajano oni jíáfodo féiraitimíai íaiói illafue nano ñue ínnogafuena jaca méidonide; mei afe ñúefuena nai náfueñediaíoi. ¡Mai, abí omoi rairuiri! Afe daítadimaci nauí dáaruina Juzíñamui llófuegamaci izóidiaíoi; ua Juzíñamui dibénedo ífócina déitaganona itíaiói. Daje izói, monamo ite Juzíñamui daína caimátallifuenta facádiaíoi. Iemo daje izói afémaci Juzíñamui Ñuera Joreño úicaillana jae facádiaíoi. Afe llezica Juzíñamui ebírede daínauai cómena ñúetatífuenta afe íaiói fácamona, ñúerana onódiaíoi. Afe emódomo, Juzíñamui Jitó uire illáimana illírui llezica, íemo ite comíni cáimadolle riinodo jae bimaci canócaiaíoi. Jae nana bie núefuiáiina fibídiaíoi. Mei íadi afe mei Juzíñamui ífuiáiina móonaitaoiñeno, aféfuiáiiana íaiói uáitaiadi ñúefuena méidofinidinona jáidiaíoi; mei daí afémaci íllamona Juzíñamui Jitona cruzmo fatátatimaci illa izói afémaci daní itíaiói. Ua nairai uíécori íena jífánodoia izói íena meáidaitadiaíoi.

⁷ Bie izoide comini comue jacafai aiñena izoide. Juziñamui biitaga noci naga éniemo diga ícaíño biide. Iemona afe éniemona ñue ria aite, afe éniemo táijidino güillena. Aféniena Juziñamui ézicite.

⁸ Iadi jiáinomo noci biilla mei, daa figóñede éegiai ailla, naa zaie diga. Afe izóidinie ráifiñedeza; nibai íanori íllamona Juziñamui fáidoite. Iirainomo afénie jobáillamo dúide, naa afénomo zicódinuairi mei figóñedeza.

Caí úiñoigafue caina riire nabaide caí ñnogafue féiñellena

⁹ Mei íadi cue izíruiga ámatiaidiomoi. Jae cue lloga faidórafue baimo jamánomo ñúefuiái dibénemo jaináidiomoi. Ua omoi jíllonafuemona comuide cáimaduafuiái maiñófirediomoi. Aféfuena ñue onódicue.

¹⁰ Juziñamui comécina jaícina jóidimie. Iemona nana íena omoi izíruillamona omoi finoca Juziñamui comini cánua ráaniaina, afémie féitañede. Daje izói aféfuiaimo nai birui jíeruitiomoi. Ua Juziñamui jaináidinona izíruillano, ñue afémacina riire canófirediomoi.

¹¹ Ie mei birui afe izire omoi nícidua izói, daje izói ómoimona illa dígamieriena Juziñamuimo ocúiriri daidicue. Iemona omoi ñnogafuiái jeire ómoína otátaacadicue, omoi úiñoigafue táinomo fáifiñeillena, mei jiáifodo ñue jaícina omoi fuitállena. Afemo ómoína nágarui izire coméciiri daidicue.

¹² Daí izire omoi comécioillamona ráiraiedino illa izói íñeitiomoi. Mei omoi

ñue comécillamona, jáiifodo daade Juzíñamui lloga ua caimare illafue dibénemo itino illa izói ítiomoiza. Afémaci íaiói ínogafuedo íaiói abina ñue finóinafuena Juzíñamui mona otíaiói. Ua comeci járitaiñeno are illa ícoimo Juzíñamui uícodo íaióimo lloga ñúefuena maiñóroidiaíoi. Iaiói illáfuemo ñue omoi coméciri, íaiói illa izói omoi íllena.

13 Mei jii, Juzíñamui iere ínofiregamie. Jai-iai Abraham illáruimo Juzíñamui uafue uai Abrahamo llote. “Aillo comini jebuítaitio” jaiiai uícodo íemo llote. Llua llezica uafue daiíllena Juzíñamui dama ie mámecina llínote, aféfuena Abraham ñue ínollena. Ua Juzíñamui dama ie mámecina llínote, mei jíaie baimo jamánomoidimiena íñédeza.

14 Daií Juzíñamui Abrahana daide: “Uafue iere ona ñue caimátaitaiticue. Jae cue o jítóretallemona, o erófene igímana jamánomo iere jebuítaiticue,” daide.

15 Iemona Abraham comeci raire járitaiñeno, diga fimona áfemo úiñoode. Daií ie ocuírina mei, afe Juzíñamui lloga caimare ie nairai jebuíllifuenta Abraham ñue maiñódeza.

16 Bínie comini cígimona dáamie uáfuenta daiíacana llezica, afémie baimo riíredimie mámecido uafue daiítate. Daií lloga uaina buna oni caitáiñede. Nana dani íaiói júfidogana záitate.

17 Daje izói Juzíñamui ie lloga finóllifue, jíaie ñue riírede uaido, aféfuena iere uafue daide. Afémie daií dáideza, mei ie uícodo lloga ñúefuena máíñoitino, afefue ua jáiifodo méidonidena jino íaióimo uáfodo llóiacadeza.

18 Daií Juzíñamui mena caitánide uáillaído íaióimo

llote. Afe ménacaiño ie daina dibénemo Juzíñamui táinona llónide. Afémie daií daide, áfemona cai comécina ñue íociretallena. Iemona caimo ie lloga ñue cai jíllonafuemo fáicanocaiño ñofiredicai. Mei jii, cai Jíllotaraima Jesucrístomo jarire jaillano caina ie úiñotaga comeci íaifue dóllena raire íemo jicádicaí, caimo ite fiénidifue iba óñeillena.

¹⁹ Afémie cai jíllotallena caimare úiñoidicai. Iemona afémie caina daináuai cai comeci nífuenina ñue mozóitade. Ua cai úiñoigafue caina riire nabaide cai ñnogafuiai féiñellena. Daií comeci docáiño ñue riire nabáitaga jacíruiñedinodicai. Mei cai jíllotaite cai úiñogamie Jesús, caifo monamo Juzíñamui nahí ie iránomo íteza.

²⁰ Afe Jesús, cai jáillio ifódimiena afénomo jae jaide. Daií íllamona afémie jae comínido Juzíñamuimo ziiñona úritillaímana jaide. Ua, jaiiai Juzíñamuimo úriraima Melquisedec izóinado, Jesús jaca ninomo caido úrite.

7

Jesús, jaiiai Melquisedec illa izói comínido Juzíñamuimo úriraima

¹ Afe Melquisedec Salem jofue illaíma. Afe llezica afémie comini dibéfodo jamánomoide daade Juzíñamuimo úrifiredimie. Jaiiai illáruimo Abraham jíáie aféniemo ite illáinina anáfenuaide. Iaioina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abi ñue finóllena Juzíñamuimo jicade.

² Afe llezica Abraham nana ie bairoca ñuera ráaniaimona, Juziñamui íena eneno mameca ráaniaina, Melquisedécimo raiñoñoeno fia fecade. Melquisedec nanoide daína mámeçi “Comécina jaícinaidillaíma” fueñe daiíacade. Ie mei afémie nane jíací ote: “Salem Illaíma.” Afeci “Comini comécina caimare uái itátatillaíma,” daiíacade.

³ Afe Melquisedec moo mámeçi jaca onónide, naa ie ei mámeçi diga. Daje izói ie emódoidigima jíái ónoñega. Daje izói afémie jocóinarui ónoñega, ie tíllarui diga. Iemona afémiena comini “Ziíñona itímie” daide. Afe Melquisedec comini cígiri illáfuedo Juziñamui Jitó ziíñona cai dibéfodo úriraimana illáfueda caina fidítate.

⁴⁻⁵ Mai bífuedo ñue omoi coméciri, Melquisedécimo ite jamánomoidifueda omoi onóillena. Ua Melquisedec, cai nanoide jáiiragima Abraham baimo jamánomoidimie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jitórede. Iemo afe jitóniaí cígimona Leví comuídeza. Afémie comini dibéfodo Juziñamuimo úrillena Juziñamui nizeda ogámie. Ie jira nana judíuai Juziñamuimo úriraini Leví úcoidigimamona comuítagaiaíoi. Afe Juziñamui nizeca Leví náiraina, Juziñamui Moisés ocuica uaido daide: “Nana jíáie judíuai nairai imácimona Juziñamuimo dúide ráaniaina órediomoi,” daide. Ua Leví náiraímo íbárede, nana jíáie Israel nairai daa Abrahámona comuídino íadi. Ie jira Leví comini nana afe Juziñamuimo dúide ráaniaina llínofirediaíoi.

⁶ Mei íadi afe Melquisedec, Leví nairai izíe íeñede.

Mei íadi afémie áfena llínoñeniadi afe Melquisedec, Leví emódoidigima Abrahámona Juzíñamuimo dúide ráaniaina uáfueña llínote. Iemona Melquisedec Leví baimo jamánomoidimieza onódicai.

Afe ráaniai ie llínua llezica, Melquisedec Abrahamo úrite. Abraham Juzíñamui íemo ñue finóllifue, uiécodo fidítagamie. Iemo ja birui Melquisedec afémie ñue éziciano daide: “Juzíñamui ona ñue cánoiteza,” daide.

⁷ ¿Nibémie mei jamánomoidimiena? ¿Ezicitimie mei nibai ézicigamie? Ua, ézicitimie baimo jamánomoina. Afefue buna jáanoñega.

⁸ Nane jiáifue llóiticue. Cai cígimona eneno nizeca Leví comini, Juzíñamui íena nano mameca ráaniaina llínofiredino. Mei íadi afémaci fia comíniza tífrediaioi. Mei jiáifodo afe jiáie llínotimie Melquisedécina mámeciredimie Juzíñamui Cuegáuai daína izói, tíñeno caade izóidimie. Ie jira Melquisedec jamánomo báimoidimie. Leví imaci nai Melquisedec jofófeneidino.

⁹ Iemo jiáifue Levido daiírede. Leví Abraham erófene igima. Mei íadi afe Juzíñamui íena eneno mameca raana llínofiredimie jaiái uícodo Melquisedécimo ie uzuma Abrahamdo Juzíñamuimo dúide raana ibade. Daií Leví comini, jaiái uícodo Juzíñamuimo dúide raana Melquisedécimo ibádiaioi.

¹⁰ Mei Leví nai jocóñena llezica ie comuállino nai Abrahamo íteza. Ua Melquisedec ja Abrahamo dúcinaruimo, Leví jocóillino nai jaca ie nanoide

uzúmamo ite.

11 Israel náiraimona eneno nizécazie Leví comini. Aféziemona nizeca nanoide Juzíñamuimo úriraima Aarón. Afémie naa ie erófene igímairi comínido Juzíñamuimo úriraini. Ie jira afe úrirainido Israel nairai Juzíñamui ocuilla uáillaina llogáiaioi. Mei íadi nana afe Juzíñamuimo úriraini finócafuiái comini ua zíñona jílloillena figo jínoinede. Comini comécina Juzíñamui jítaina izói nahí jaícina jóoitañede. Aarón naa ie erófene igímairi finócafuiái figo jínoñena jira, jáie afémie izóinede baimo jamánomoidimiena jitáidicái, afémaci méifomo jóonellena. Ua Melquisedec zíñona illa izóidimiena jítaidicái. (Ie jira afe Aarón comini meifo méidoitimiena Juzíñamui jae jino náiraímo cíotate. Afémie mámece Jesucristo. Ua Aarón comini méifomo jóonegamie Melquisedec izóidimie Jesús; afémie Aarón dibéfomo jaináñede.)

12 Jae afe jaiai uícomo ite Juzíñamuimo úriraini nana dáanomo jáiiena íaioi méidua llezica, afe Moisés íaioimo ocuica uailai daje izói jáífodo méidorede.

13 Juzíñamui Cuegáuai daí dainámie cai Ocuíraíma Jesucristo. Afe como jóonega Juzíñamuimo caido úriraima Jesús, Leví nairai ímieñede. Jáiziemona comúidimie. Ie nairai ímilaina jaca nizéñega, Juzíñamuimo comínido úrillena. Ua comini fia fecaca tóica rílleniai naa ráaniai diga Juzíñamuimo izájillena, nízeñegaiaioi.

14 Ñue onóigaza cai Ocuíraíma Jesús Judá náiraimona comúidimie. Moisés afe náiraímo Juzíñamuimo úrirainina íllena, jaca lloñede.

15 Afe jiáie como jóonega comínido Juzíñamuimo úriraima Jesús, jino cióillamona, bífuiaina jino uáfodo baimo onódicai; mei dama afémie Melquisedec izóinaza.

16 Bímie dama ie ñue zíiñona ífirenamona comínido Juzíñamuimo úriraimana jaide. Mei jiáifodo Leví náiraimona jai ai nizeca Juzíñamuimo úriraini ocuica uai dáinado úrirainina jáidiaioi. Afe uai ñie náiraimona nizéllena llote.

17 Mei íadi como jóonegamie Jesuna Juzíñamui ñue riírede nabáitaja uaido daide:

“Melquisedec izói jaca ninomo Juzíñamuimo comínido zíiñona úriraimana ja birui itíoza,” daide.

18 Iemona afe uícodo ite ocuica uai jae oni caitaca, mei afe uai riínideza. Iemo jiái, aféuai comini comeci nahí duáfueña figo jínotanideza.

19 Afe Moisés ocuica uai buna comécina nahí jaícina finóñede. Mei jiáifodo jiáie aféuai baimo, ñuera cai jíllotaite úiñoigamie Jesucristo jae caimo cíotaga. Afémiedo Juzíñamuimo áinozifiredicai, uáfodo Juzíñamuimo cai úrillena.

20 Afe Jesucristo Juzíñamui riire nabáirede uaido jóonega.

21 Ie uícodo Juzíñamuimo úrirainina jáidino, riírede uaido jóoneñegaiaioi. Mei íadi Jesús comínido Juzíñamuimo úriraimana jáillaruimo, Juzíñamui riire nabaica uaido ja daí mameca. Mei Juzíñamui ie Cuegáuaimo Jesudo úrite, daide:

“Cue Juzíñamuidicue. Bifue riire cue nabaica uaido daidicue. Cue comeci faca uai jaca jiáiuaina méidoñeiticue.

O zíiñona comínido Juzíñamuimo úriraimana itío;

Ua Melquisedec izóidimedio,” daide.

²² Ie jira Jesucristo, Juzíñamui jamánomo ñuera caimo comue finóllifue caína ñue onótate. Ua Jesucristo aféfuemo iere uafue daide. Afe finóllifue Moisés lloga nanoide finóllifue baimo ñuera.

²³ Jesucristo uícoidiruillaimo ite Leví náiraimona nizeca Juzíñamuimo úriraini ua aillo ite; mei íaiói tícoizifirenaimona jaca jáimiena méidofiregaiaíoi.

²⁴ Mei íadi Jesús cai dibéfodo Juzíñamuimo úrillana, jaca jáimiena méidonide; mei afémie jaca ninomo zíñona itímieza.

²⁵ Iemona Jesús nana íedo Juzíñamuimo úrizabitinona, jaca ninomo jaícina ñue jíllotarede, mei afe Jesús, íaióri Juzíñamuimo zíñona úriraimana íllaza.

²⁶ Ua, afémie izoide Juzíñamuimo comínido úritillaimana jaiái ninómona jitáidicái. Ñue cai jíllóillifue afémie caimo ñue zúitaitímie, mei afémie nahí ñuera ñífuenidímieza. Afe llezica afémie nana fiénidímaci íaifuemona oni eneno rairuícamié. Ie mei afémie mona ero úcuai illa caifomo, Juzíñamui nahí illánomo uigámie.

²⁷ Jaiái uícomo ite Juzíñamuimo úritillaini nágaruillaido tóica rílleniaina fatá Juzíñamuimo izájifirediaíoi. Nano fueñe dani íaióimo ite íaifue ícoinia áfeniaina izájidiaíoi. Afe mei comínimo ite íaifue ícoinia áfeniaina izájifirediaíoi. Mei íadi Jesús afe izói fínuana jitáíñede. Afémie dácaiño nana comini íaifue ícoinia dama ie abi Juzíñamuimo fecade. Ua cruzmo ie duere zefuida tíllado abi fecade.

28 Afe Cristo uiécodo lloga ocuúllafuedo llotino, jáie jamai figo nahí jáicina finótañede comínimona Juzíñamuimo úritillaínina mamédiaioi. Mei jáífodo, afémaci méifomo jóonega úritillaíma Jesucristo, Juzíñamui ñue riire nabaíca uaido jóonega. Afémie jaca ninomo nahí jáicinaitaga Juzíñamui Jitó.

8

Juzíñamui caimo cómuena finóllifue, Jesús caimo jino denódimie

¹ Nana cai daínáfuiamona llógana bie ñue nahífuena ómoimo llóiticue: Como lloga caimo ñue jóobide caido Juzíñamuimo úriraima birui ja caimo ite. Afémie caifo monamo ite Juzíñamui nabézimo ráinazaide.

² Dinomo Juzíñamui nahí illánomo Jesús íllamona, jamánomo ñuera Juzíñamui uiécomo Jesús caido úricabite, cai jíllóillifue ñue caimo zúillena. Afe Juzíñamuimo cai nahí áinozirano comini finoñega. Jaiái bíniemo ite Juzíñamuimo áinoziraco comini niga.

³ Naga Juzíñamuimo úritillaíma, fia iga ráaniai, tóica rílleniai diga Juzíñamuimo fecáfireitimiena mameca. Ie jira cai dibéfodo Juzíñamuimo úriraima Jesús, daje izói dama ie fécajille raa jitáirede.

⁴ Bíniemo afémie nibai abido ie bia, afémie caido Juzíñamuimo due jiza úriraimañeite, mei Moisés ocuúcauai daína izói Juzíñamuimo caido úriraini bíniemo nai íteza. Daje izói bimaci nai benó Juzíñamuimo fia fecaca raana íemo izájifirediaioiza. (Ie jira caido ziiño úriraima Jesús, caifo monamo Juzíñamuimo cai ie canólledo úricabite.)

⁵ Bíníemo ite Juzíñamuimo úriraini aillo ráfuiaido nícidotiaioi. Nana íaioi nícidogafuiaí jánana mameide. Iaióí finócafuiái caifo monamo ite Juzíñamui nahífuiaína caina fidítate. Daje izóí bíníemo ite jaiái Juzíñamuimo ánoziraco, Juzíñamui nahífuena cai fidítaraco. Afena onódicaíza, mei Moisés afeco nitátaacanaruimo, Juzíñamui íena daide:

“Caifónedumo o illa llezica omo cue ácataga afécona o ciona izóí, afe izóí jaícina mai o niiri,” daide.

⁶ Mei íadi bíníemo ite Juzíñamuimo úriraini nícidogafue iere afe baimo, cai caifo monamo ite úritillaima Jesús caído jamánomo ñúefuena nícidote. Mei jii, afe Jesucristo caimo zuitaca Juzíñamui ñuera cairi comue finóllifue, jaiái Moisés lloga finóllifue baimo ñuera. Mei Moisés ocuica uai baimo, Juzíñamui uícodo lloga cómfue jamánomo ñuera uáimona comuídeza.

⁷ Afe Moisés lloga nanoide finóllifue, comini jílloillena ñue jínoidi, jíáie uire iite ñue finolle uai jítaiñeitiaioi. Mei íadi afe naonide uai íaioi jílloillena figo jínoñede.

⁸ Afe nano ocuica uai jeire otino nahí jaícinaidifuomo figo dúciñediaioi. Dúciñediaioimona, Juzíñamui ie Cuegáuaimo íaioína daide:

“Uire jíairuido nana Israel náiraimo comue ñue cue finóllifue ócuiticue, naa Judá náirairi.

⁹ Jaiái íaioi uzútiaimo cue daína ocuica uai izóí, ócuiñeiticue.

Jaiái aféruillaído Egipto éniemona afémaci billa
llezica íaiíoina ifódicue:

Ua afémacina izire úcaidicue.

Mei íadi cue lloga ocuica uaina nano íanori
fáicanocaillano, áfena figo náfueñediaíoi.

Afe jira íaiíoina zóofeticue,” Juzíñamui daide.

¹⁰ Nai nane íaiíoina lluno Juzíñamui daide:

“Uíreituillaído Israel imácimo bie izói cue ñue
comue finóllifue ócuiticue.

Aféruillaído cue ocuica uáillaina íaiói ifócimo
jaícina déitaiticue.

Ua aféuaina íaiói comécido jeire íaiíoina otátaiticue.

Iemona afémacina dama cúeiena nane meine
abído máíñoiticue.

Afe llezica íaiói nahí Juzíñamuina íiticue.

Iemo cue náiraina íitiaíoi.

¹¹ Aféruillaído nana afémaci uáfodo ñue cuena
ónodiaíoiiza, cuena íaiói onóillena abi diné
jíáima llónide.

Iemona ie abi ímiaímo buna Juzíñamuina
onótanide. Daje izói dámie ie ámamo
Juzíñamuina onóillena llóñeite; mei nana
cuena ónodiaíoiiza.

Naga jamáimie, íemo jíái naga jamánomoide
ríiredillaíma, nana daje izói cuena ónoitiaíoi.

¹² Nana íaiíoimo cue dúecaillamona íaiói fieni
finócafuiái ibana óñeiticue.

Nana íaiói comeci íaífuiaina jaca ninomo
féitaiticue.

Aféfuiaina úbiñoñeiticue,” dinó Juzíñamui daide.

¹³ Bie méifodo lloga Juzíñamui finóllifue, cómofuena
méiduamona, afe uícodo Moisés lloga finóllifue
jae jaiáiza feide. Afena Juzíñamui daíí uáfodo

llote. Iemo naga jaiyai raa zabízaillamona raíre oni dotánocaiga; oni dotánocailleza cíóñelle.

9

Bíniemo ite Juzíñamuimo áinozirano, jana izói jiáie monamo ite Juzíñamuimo áinozirano cai fidítate

¹ Afe nauí nano lloga finóllifue llua llezica, Juzíñamui íemo áinoziraco nitátate. Afe nitátaja dáaruído, comíni Juzíñamuina íóbitalle uaillai afémacimo daje izói lloga.

² Afe lloga Juzíñamuimo áinoziraco Moisés nitátaga. Afeco ere niñeno jédaciede iníroina íbaícaco. Afe áreco ero ménaco titaca. Jinóidico Juzíñamui Ñúeco daína. Afeco eromo áillue mechera izoide egáñora ite. Siete diga dájemona boode raa ite. Dáanomo Juzíñamui dibénemo oni enénorie rairuica pan jóonerabani ite, naa afe páaniairi.

³ Afe áinoziraco jofóidico Jamánomo Ñuera Rairuícaco daína. Afe jofóidico daje izói jédaciede iníroina ruica diné eróicana nacona íbaica. Jédaciede jígaroi izóidena fetaca.

⁴ Afe fetaca jédaciroi abimo uguci jobáirabani ite. Bibani llaide órona jinófene aifítaga. Bie jofóidico eromo daa áillue ráaniai éenora ite. Cajona eroide. Afe éenoraco nana jinófene órona aifítaga. Afe éenoraco eromo Juzíñamui nofici íbícimo cuega ocuica uaillai ite. Ie jira afeco nofíbícimo cuega Juzíñamui cai ocuilla éenuacona mameina. Iemo afénomo daa oro finoina nogo ite. Afégomo ite Juzíñamui monámona cocítaga

güille. Afe güille mámeçi maná. Daa afe éenoracomo Aarón jigüida izoide radozi ite. Afe idozi jamai jazici radozi óinaza dúididozi. (Zícorede juzítófe izóíñede.) Mei íadi Juzíñamui afe idózina éniemo riñeno, fia táinomona zícótano raire ñue llizítate.

⁵ Afe éenoraco íbáirabici emódomo mena oro finoína Juzíñamui abi imácina eroide jana naidáide. Mei íadi afe íaillinoi íáicorede. (Afe íaillinoi mámeçi ráimona “Querubines.”) Afe íaillinoi conima uíecomo eródiailinoi. Iaillinoi naidaina cígimo Juzíñamui cíocafirede. Afe Juzíñamuina cíóñenaza; dama ie abi egáñuana cíófirena. Afénomo faga tóiniaí díena recuífirediaioi. Daíí recuífirediaioi, Juzíñamui meine abido comínimo dúecaillano, íaioimo ite fiénidifue íba íaioimo óñeilla, ua afe ícoinia íaioína duere fínoñeilla. Nana afe dibénemo ite duera nícidogafuíaína ja birui benomo llónide.

⁶ Afe ocuica áinoziraco nilla mei, íemo naa ie jofo ero ráaniairi fínua mei, comínido Juzíñamuimo úriraini jinóidícomo jáifirediaioi. Afénomo íaioimo ocuica comínido Juzíñamui íóbitalle ráaniai finófirediaioi.

⁷ Mei íadi afe jofóidícomo, dama Juzíñamuimo úritillaíma jáifirena. Aféllaíma naga fimónaíaido dácaíño afeco jofo eromo jáirede. Faga tóiniaí díena jaca jofo úifirede. Dama íemo ite onóñeno finoca fiénidifue ícoinia daíí díena Juzíñamuimo izájide. Ie mei nane nana comini íaifue ícoinia jáíie díena Juzíñamuimo izájide.

⁸ Bífuaíido Juzíñamui Ñuera Joreño daa jáífueña cai fidítaiacade. Afefue daide: “Baie jinóidíco

naí illa llezica, jofóidicomo jiba comini jaille nai rairuireda. Ua aféruillaído jofa dama Juzíñamui illánomo jáinidiaioi.

⁹ Nana bie Moisés illágmado nícidogafuiaí birui cai onóillena canode. Ua comínimo ácatafirega raa izoide, aféruído Juzíñamuimo ánozillena nigaco, naa afe eromo íaioi nícidogafuiaíri, ñue jaícina caina onótate. Biruillaído judíuai aillo faga tóiníai jáie fia fecaca raa diga, Juzíñamuimo nai izájifirediaioi. Mei íadi afe bíedo íaioi comeci Juzíñamuimo ñue jaícina jóitanide, mei íaioi comécimo ite fiénidifuiaí nai féitañegaza, fia ibaica izói íteza.

¹⁰ Nana afe íaioi nícidogafuiaí fia jinófene ífuiái. Nñe izói íitiaioi daide. Dárie íaioi güille, jirolle diga fímairillafuedo úrite. Afe izói fia emódoide múiñuafuedo úrite. Nana bífuiái fia nano nié dino comínimo ocuica, mei Juzíñamui jáífuena méidolliruimo nai dúciñedeza. Ie jira aféfuiái daa aféruillai íena ráífide.

¹¹ Mei íadi caído Juzíñamuimo úrifireitillaimo Jesucristo, jae caimo dúcide. Afémiedo ñuera cáimafuiaí caimo zúide, mei ua nahí Juzíñamuimo ánoziracomo afémie jáináideza. Afe jaiái bíníemo ite comini niga Juzíñamuimo ánoziraco jaboide. Afécomona cai íóbillafue baímo, Jesucristo jamánomo ñuera jíllonafue, caífo monámona ana caimo zúitaíbite. Afémie afe nahí Juzíñamuimo ánoziracomo dúide; afeco bíníe comini níñega. Dama ie nahico monamo ite.

¹² Nana comini íena, dácaíño afeco eromo ite jofóidicomo afémie jaide. Ie jailla llezica chivo die,

juráreto jiza die diga uiñede; mei jiáifodo dama ie die uite. Mei jii, afémie íaifuenidimiena íllamona, cruzmo cai ifomo tíllano, ie die tótado ziiñona cai jíllonafue ote.

¹³ Jaiái Moisés daina izói, íaicaillamie íemo ite íaifue bie izói muiñórede. Múíñoñegamie Juzíñamuimo dúide comini cígido macánide. Daje izói afémie Juzíñamuimo nabáirinide. Ie jira faga tóiniaí die atírede. Iemo jiáie Juzíñamuimo mameca juráreto jiza jobailla afe jízechoma atírede. Ie mei afe íaicaillamie aféchoma júdairede. Iemona afémie íaicaíñegamiena jaide. Mei jínofena muiñócaza. Ja Juzíñamui comínimo meine abido caimare úriredede.

¹⁴ Mei jii, Juzíñamui dáinamona afe tóiniaí die riírede, come jinóidifuemo muiñóllena. Afefue daiítania, ua onódicaíza. Mei Jesucristo die jamánomo riírede. Ua dama afémie ñue nífuenidimienado Juzíñamuimo ie abi dama izáibite. Afe ziiño Ñuera Joreño ie cánuado Jesucristo dama ie abi Juzíñamuimo izájide. Iemona ie die tótamona nana cai comécimo ite íaifuiaina muiñótate. Ua nana cai jaiáimona nícidogafuiái caina ziiñona cáatañede. Mei íadi Jesucristo díedo cai comeci múiñua mei, ua ziiñona cáatagacái, afe jaca nahí caade Juzíñamui ocuícano ráiruiñeno cai jetállena.

¹⁵ Ie jira Jesucristo jae Juzíñamui comue finóllifue caimo jino zúitaitimie. Afémiedo nana Juzíñamui nizécano uafue uícomo lloga ziiñona cáimaduafuena maiñóritiaíoi. Juzíñamui daíí nana

comini jilloillifue uícodo mamede, mei dama Cristo tíllado comini fiénidifuiái Juzíñamui dote. Ua jaiái uícodo lloga nanoide finóllifue illa llezica, nana aféruimo afémaci fieni finócafuiái ja birui Cristo tílla jírari, Juzíñamui dote; duano, nana íemo ñnotinona jíllotate. Daí Juzíñamuimo zíñona caimare nabáirillafue maiñódiaíoi.

¹⁶⁻¹⁷ Afe maiñórillafue, come tílla méifomo ítifue izoide. Dámie tíadi ie fiébide feci raa jíaimie oni llínoga. Afémie nai tíñenia, feci raa oni llínoitimie minica raana nai llínonide. Ie jira oni llínoitimie íemo dúide raa maiñóllena, afe raa naama tílla jítaírede. Daje izói Juzíñamuimo caimare nabáirillafue cai maiñóllena, Cristo tílla jítaírede.

¹⁸ Afe jira jaiái uícodo lloga Juzíñamui ñue finóllifue tániaruimo díena recuíñorediaíoi.

¹⁹ Moisés nana afe ocuica uailai nana comínimo jino llua mei, afe uailai cuiábicimo faga tóiníai díena cuirínote. Daje izói afe mei nana comínimo cuirínote. Ua llua mei, Moisés duera “hisopo” daína raroci llínote. Llínuano, afécimo jáirede oveja itíraína maite. Iemo jáinoina jaicuica díedo afe rarócina riáitate. Ríaitano, ocuilla uai cuiábici naa comíniri díena cuirínote.

²⁰ Cuirínua llezica Moisés daide: “Juzíñamui ómoiena ocuica ie finóllifue bie die uafue daítate,” daide.

²¹ Daje izói aféruillaído Moisés íaíoi iniroi finoina Juzíñamuimo ánoziracomo díena cuirínote. Daje izói nana afeco eromo ite Juzíñamui íóbifirena

raamo díena cuirínote.

²² Ua, Moisés ocuica uai daina izói jamánomo diga raa, díedo Juzíñamui dibénemo dua izói ñue finoca. Iemona die tótañegana comini comeci íaifuiái iba jaca órede.

Cristo dama ie abí Juzíñamuimo izájille comini fíénidífuiaína muiñode

²³ Afe comini niga Juzíñamuimo áinoziraco Juzíñamui ocuide, naa afeco eromo ite ráaniairi. Iemona nana afeco eromo ite ráaniairi Juzíñamui dibénemo ite nahífuiaína jánana cai ciona izói caina onótate. Nana biniemo ite afeco ero ráaniai Juzíñamui illánomo nahí itífuiaí jana. Ie jira biniemo ite ráaniai dibénemo figura Juzíñamui daiíllena, bie die recuille jitáirede. Mei íadi Juzíñamui nahí illánomo jáifireitino dibénemo, bie die baimo ñuera Juzíñamuimo fia izájifireille raa jitáirede, afémacina Juzíñamui iere figura daiíllena. Ua tóiniaí die baimo Jesucristo jamánomo ñuera die jitáirede.

²⁴ Iemona Cristo tílla llezica, afe Cristo biniemo ite comini niga Juzíñamuimo áinoziracomo eromo jofo jáiñede. Afe bico fia nahico jana. Mei jáífodo Cristo, Juzíñamui nahí illánomo caído úrillena jae cílocaizaide.

²⁵ Afénomo Cristo dama ie abina, diga icaiño meine nane izájíñede. Mei íadi biniemo ite Juzíñamuimo comínido úritillaíma, naga fimónado faga tóiniaí die uillano, afe Juzíñamuimo jáiraco jofoide iere ñuera rairuíredicomo jaide.

²⁶ Afémaci jáifirena izói Cristo jáifiredena figóñede. Mei nibai afémie daí diga icaiño jáiadi,

íemo énie fínuaruimona afémie afe izói diga icaiño meine abido tírede; mei íadi afe izóiñedeza. Afémie cai illáruillaído jaiái lloga Juzíñamui finóllifue fuilla llezica, dácaiño fia cómena íficaillano caimo cíocaizaibite. Ua afémie bíniemo cai jiáinona ie tízaibillado, nana caimo ite fiénidifuiái niné féillena oni dote.

²⁷ Ja onóigaza, naga come bíniemo dácaiño tíide. Tíilla mei, íaiói illafue Juzíñamui jaícina jicánoite. Aféfuena daje izói ñue onódicai.

²⁸ Daje izói Jesucristo, comini fiénidifuiái oni dóllena dácaiño tízaibite. Ie mei uire jiáiruido afémie fiénidifuiaina duáibiñeite; mei jaiái ie dógaza. Mei íadi afémie uafue meine dáanomo cíocaizaibite, nana íena izire úiñoidinona jíllotano monamo ie illánomo úillena.

10

¹ Mei jaiái Moisés ocuica uai naa ie lloga níciduairi, ico nirui bite caimare illífuiái jana. Afe ie lloga jáiaifue nahífueñede. Moisés bie ico zúitífue cai onóillena jana uícodo llote. Iemona naga fimónaiaído faga tóiniaína íaiói úifirena, íaiói comécina figo jaícina jóitañede. Mei uáfuenta, afe faga tóiniaí íaiói úifirena Juzíñamuimo áinozidino nahí íaifuenidina jaitañedeza.

² Mei daií uafue íaifuenidina íaiói jáiadi, nibai afe tóiniaína izájifirenana fáicanocaidiaíoi; mei jiáifodo fáicanocaiñediaíoi, nai comécina jaícina jóoneñegaiaíoi za. Daje izói áfedo Juzíñamuimo áinozidino comécina íaifuenta nahí nífuenidina jáiadi, nibai jae íaiói fiénidifue izire íaíoi mo ñede.

Mei íadi íaiói fiénidifue jaca izire íaiómo ite. Iemona onódicai, tóiniaí fecáfírena íaifuenta figo doñede.

³ Mei íadi afe fatá Juzíñamuimo izájitaga tóiniaína ciónamona, comíni íaiói fiénidifue naga fimónaíaido úbicaitagaíaiói.

⁴ Mei jii, juráretuai, chívuai die diga, jaca come fiénidifuiái dónide. Mei áfemo ua dolle ríino iñédeza.

⁵ Ie jira Jesucristo bíniemo bíacana llezica ie Moo Juzíñamuina daide:

Omo fia fecaca faga tóiniaína gáíñedioza, comíni na iere figura o daíllena.

Mei jiáifodo énie cómena ja cuena jéicitaitio.

Afemona cue tílledo íaióina óiena nífuenidinona jáitaiticue.

⁶ Ua comíni íaifue ícoínia jobaica tóiniaí ja birui ona ióbitañede.

⁷ Ie jira cuegánico cuedo úrilla izói birui ona daidicue:

“Moo Juzíñamui benó bíniemo o comeci jitáillafue fínuaíbiticue,” daide.

⁸ Nano fueñe afémie daide, nana afe Juzíñamuimo fia fecaca tóiniaí, íaifue ícoínia jobaica tóiniaí diga Juzíñamui comécina zuitañede. Ua íena ióbitañede, nana afe nícidogafue jaiái ocuilla uai daína íadi.

⁹ Afe emódomo Jesús daide: “Moo Juzíñamui, ja o comeci jitáillafue birui benomo fínuaíbiticue.” Daí Juzíñamui nana afe jaiái ocuica nícidogafuíaína zóofete. Zóofiano, afe méifomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena.

10 Daí Jesucristo, ie Moo Juzíñamui comeci jítainafue izói finode. Daí ie finuamona jae dama Juzíñamui nabaina ñue finócamacina jáidicai. Mei jii, Jesucristo dácaiño jaícina nana cai fiénidifue oni eneno féitate. Mei ninomo féiñeitena cruzmo dama ie abi Juzíñamuimo izájideza.

11 Naga judío Juzíñamuimo comínido úriraima nágaruillaído naidáillano daje izói faga tóiniaina Juzíñamuimo izájifirede; mei íadi afe rilledo comini íaifuiái dónide.

12 Mei jíáfodo Jesuscristo dácaiño comini fiénidifue ícoinia duere zefuida, tízaibite, afe izói dáanomo íñeilla. Ie tíilla mei meine abido cáaillano caifo monamo Juzíñamui nabézimo ráinazaide, nana comini íaifue múiñuana fuilla jira.

13 Dinomo, nana ie fairíconi ie anamo íaioi itábicaillena afémie úiñoide.

14 Mei jii, Jesucristo, dácaiño ie Moo Juzíñamuimo ie abina izájide. Afe izájillafuedo, nii cruzmo ie tíillamona, nana caina ie nabaina ñue finode. Jae nana cai comeci íaifuena ñue múiñuano jaca ninomo caimo caimare érocaide.

15 Aféfuemo Juzíñamui Ñuera Joreño uaina nabáide, iere uafue cai daíllena. Ñuera Joreño Cuegáuaimo daide:

16 Juzíñamui daide: “Uire jíáiruillaído cue comínimo bie izói jíáie como cue finóllifue llóitícue, naa jíáie cuemo íñotinori.

Aféruillaído cue ocuica uáillaína íaioi comécimo jaícina onótaitícue.

Ua afe uaillai íaiói ifócimo ñue jino denótaiticue,”
daide.

17 Ie mei nane emódomo daide:

“Nana íaiói fiēni finócafuiai ibana otátañeiticue.

Daíí oñena llezica, íaiói comécimo ite íaifuiaina jaca
niné féitaredicue.”

Dinori Juzíñamui daide.

18 Nana comini fiēnidifuiái daíí dua mei, jíái íaifue
ícoinia dóllena fatá fecaca tóiníai jae jítaiñega.

Juzíñamuimo cai áinozillena jítárede

19 Iemona, ámatíai, cácarei. Jae Juzíñamuimo
cai jáillio uáfodo túide. Ua ie nahí illánamo, afe
iere ñuera rairuícacomo caimare jacíruiñeno íemo
úrizairedicai; mei Jesús cairi tíizaibillano caina
Juzíñamuina éoitadifue oni muiñócaza.

20 Afémie tuiñoca io ñuera rairuiredico jédaciede
ibáiraroido joide. Jira Juzíñamui illánomo cómena
cáataite comue io Jesús tuiñuano, afe iodo afémie
caina ifode. Afe io tuiñóllena dama ie abí izi
cácatate, íemo cruzmo duere zefuírede.

21 Iemona Jesús nana Juzíñamuimo ínotinodo
Juzíñamuimo Uritillaimana jae jaide.

22 Afémie ja cairi úrioinamona, mai Juzíñamuimo
jacíruiñeno omoi áinoziri, mei íemo ñue cai
ínuamona jae meáiruiñedinona mamécacaíza.
Ie jira jífuenide comécido, mai omoi áinoziri.
Ainozillano, mai íemo caimare cai úrilli. Ua táinona
lloñeno mai íemo comeci cai facalli. Mei nana
cai íáirede comeci ícoinia afémie jae jaícina oni
féitagaza; ua come abí ñue jáinoido jocoina izói
comécina muiñócaíai.

23 Afe uáfodo jino comínimo cai lloga Juzíñamuimo caimare cai úrillafuena, mai fáicanocaiñeno áfemo izire cai ínofireilli, mei afefue caimo llotímie Jesús jaca ínofiregamieza.

24 Daje llezica illa dígamierie, mai conímamo ñue cai comécilli, conímama cai izíruillino cai jenóllena. Daje izói jíáimana ñúefuiana rairuíneno jíeruillinona jenóredicaí.

25 Daje izói omoi Juzíñamuimo gairífirenafuena mai féitañeno iri. Dáarie aféfuena féitafirediaíoi. Daí illa fiénide. Mei jíáfodo, Jesucristo meine billirui raire dúciacanana omoi onónamona, mai conímama ñue úrillauaido comécina caimare cai náireitalli, nana cai ínogafue féiñellena.

26 Juzíñamui llogafue daide: Jaca dama Jesús tíllamo cai ínua mona jílloredicaí. Aféfuena cai ie onótaja mei, mei íadi afe uaina nai cai ruifíruioiadi jae abi dine jíáie cai íaifue múiñoitena íñede.

27 Daí ruifíruioidimacimo jamánomo izire jácifue zúite, mei Juzíñamui duere íaíoi finóllifue mo jae ánozideza. Afémie iere íaíoi mo rícaillano iere boode jíáfodo joide iraimo íaíoi na duere zefuítaite. Ua nana Juzíñamuina bacáuairedinona irai amena cuarita izóidemo, Juzíñamui íaíoi na dinomo zíñona duere zefuítaite.

28 Moisés ocuica uaina ruifíruitimiena raire titádiaíoi. Ua, mena nibai daámani uai nabáiraini daína uáimona, íemo dúecaiñeno íena titádiaíoi.

29 Mei Moisés ocuica uaina ruifíruitimiena daí duere finóbiteza, Juzíñamui Jitona ruifíruitimie mo jamánomo izire duere finóllifue, afémiemo zúiteza. Afémie Jesús díena jámairuitimie. Afe tíllamo totaca díedo, afémie nauí dácaíño Juzíñamuimo

oni eneno nizécamiena jaide. Mei íadi Jesuna ruifruitimie caimo dúcaifirede Ñuera Joréñona iaire daiífiredimiena jaide. Daií itímiena iere Juzíñamui duere finórede.

³⁰ Ja birui daií itímie fiénidifue iba ófiredimiena onódicai, níimie cai Moo Juzíñamuina. Afémie daide: “Afe iba ófiredimiedicue. Ua nana íaifuiái ibana duere finótafiredimiedicue,” dáideza. Jiáinomo Juzíñamui Cuegáuai daide: “Juzíñamui ie comini comeci ífuenta jaícina jicánoite. Jicánuano íaioimo dúide duere finóllifue ócuite,” daide.

³¹ Daií ie úrillana cai onónamona, caade Juzíñamuimo duere finóllena izájina jamánomo jacírede.

³² Mei íadi nauí íanori omoi illáfuemo uibíoiri. Aféruimo ñúefuena omoi onona mei, aillo duere zefuídíomoi, mei íadi aféruimo omoi ínogafue fáicanocaiñeno ñue ocuídíomoi.

³³ Dáruillaído uáfori comini eróicana báíñuano duere finócaomoi. Jiáiruillaído daií finócamacimo omoi nabáillamona duere zefuítagaomoi.

³⁴ Afe llezica llaveca ámatiaimo dúcaifiredíomoi. Afe baímo, ómoimo ite ráaniaina jiáimaci báiruana caimare rairuñediomoi, mei onódiomoiza, biniemo ite raa baímo, jamánomo ñuera jaca bairónide raa ómoiena monamo íteza.

³⁵ Ie jira nauí izire omoi ínoga uaina mai birui omoi féitañeno iri. Aféuaina ñue omoi ínofireiri, mei ícoimo iere ñuera jirídoga ízoide raa máíñoitiomoiza.

³⁶ Juzíñamui jítainafuena omoi jíeruilla llezica raire comeci járidoñeno írediomoi. Ua, omoi

ínoga ñúefue, omoí are jaícina llocana uille mei, Juzíñamui uícodo lloga caimare jíllonafuena máíñoitíomoi za.

³⁷ Mei jí Juzíñamui Cuegáuaimo daide:

“Ja íanori íllamona, uícodo lloga bíitimie Jesucristo, jíjíñeno raire dúcizaibite.

³⁸ Afémie nai biñena llezica, níñfuenidena cue mamécamié, cuemo ie ínuado nágaruillaído caimare ie illano, cuena íóbitaite.

Mei íadi afémie afe ie ínoga uaina meine abído féitaiadi, afémieri íobiñeiticue,” dinó Juzíñamui daide.

³⁹ Mei íadi meine abído féitatiño dibénemo jaináíñedícai. Afémaci daí íaiói íñoñenamona jíllóñeitiaíoi. Mei jíáí fodo cai bie Jesucrístomo ínotínodícai, daí dani cai jíllotagacai.

11

Juzíñamuimo cai ínuafue

¹ Mei ¿mínica ínuafuena? Ínuafue Juzíñamui daína uaina jeire cai uafue. Ínuamona cai úíñoga cáimafue jeire cai ollínona onódícai. Daje izói Juzíñamuimo ínuamona, ie lloga cáiena mameca ñuera raa cióñena íadi, afefue ua íllana comécido ua onódícai.

² Ua, ínuafuedo judíuai jaiáidígimamona Juzíñamuimo jaináidimíai, Juzíñamui comeci jítaillamacina jáidiaíoi.

³ Juzíñamuimo cai ínuamona, Juzíñamui ie úrilla uaido bínie fínuana onódícai. Daí ie fínuado nana bie cai ciona énie, táinomona Juzíñamui comuíate.

Ua, minícana iñédeza cióñena ráamona naga ráaniai comuíbicaide.

⁴ Juzíñamuimo ñnuano Abel, Caín fecaca baimo, ñuera Juzíñamui ióbitalle raa fécaibite. Iemona Abel Juzíñamui dibénemo jaícina itímiena jaide. Juzíñamui jiéruigamiena jaide. Mei Juzíñamui Abel fécaibiga raa llñnuamona, Juzíñamui comeci Abelna jítainana onódicai. Daií Juzíñamui íena jiéruillafuedo Abel jaícinaidifuemo Juzíñamui uai nabaide. Afe Abel, jaiiai uícodo Juzíñamuimo ie ñnuado ñue illáfuedo jaide. Aféfuena cai fídiamona, afémie titácamié íadi, ie ñnogafue, úrillauai izói caimo úrite. “Juzíñamuimo ñue cai ñnolli,” caina daide.

⁵ Iemo Enoc Juzíñamuimo ie ñnuado tíiñeno caifo monamo uiga. Daií tíillana ie ónoñeillena, cáanori monamo Juzíñamui uiga. Afe mei afémie biniemo cióñenamie, mei afémie Juzíñamui úigaza. Afémie nai úiñega Juzíñamui ióbitadimie dainámie.

⁶ Mei jii, Juzíñamuimo cai ñnoñenia jaca íena ióbitanidicai. Dáamie Juzíñamuimo ánoziacania, Juzíñamui nahí illánona uícodo ie ñnolle jítáirede. Nane íemo nana izire íena onóiacadino, ñue ibana dama ie abi ífuena íaioina onótaite. Aféfuemo uícodo daje izói ñnorediaioi.

⁷ Daje izói Noé, Juzíñamui lloga raire biite nai cióñena duere finóllifuena fídiano Juzíñamuimo ñue ñnote. ñnuano áillue jofóredicae finode, áfedo nana dama ie comini daií jilloillena. Noé daií dama Juzíñamuimo ñnuado, nana jiáie ñnoñede comínimo duere finótatiuai jino íaioimo llote. Afe

izói Juzíñamuimo ínuado Juzíñamui comeci jítaina nífuenidimiena jaide.

8 Afe mei jaiáidiruimo Juzíñamui Abrahana jírite, jáie éniemo jaiánillena, áfeniena ico jáíruido íeiena maiñóllena. Abraham Juzíñamuimo ínuamona afe jírilla uaina cacáillano, raire ie illániemona oni jáínomo jáizaide, ie dúcillino nai ónoñega íadi.

9 Abraham nai Juzíñamuimo ínuamona, Juzíñamui íemo fecáacaiga éniemo fia jicánemiena diga fimona fia ite. Ua, iniroi niina úcaifirega jofomo aféniemo are íoide. Daje izói Abraham comútaga jító Isaac, dinómona Jacob diga afénomo daje izoide iniroi nillácuaimo are itíaillinoi naa ie comíniri. Juzíñamui daje éniema fecalle uaina Abrahamo llua izói, afe íaillinoimo uícodo llote.

10 Ua Abraham afe jamai illácuaimo dama íeieñede éniemo caimare íoide. Afémie caimare ite, mei Juzíñamui dibénemo ite caimare táinocaitanide illínomo dúcillena afémie úiñoideza. Afe caimare illico Juzíñamui mamérrillano dama ie uaido niga.

11 Daje izói Abraham ai, Sara, Juzíñamuimo ínuamona, jamánomo jónaite íadi, fueñe úruerena ríino ote. Iemona daa jító jocode, mei Juzíñamui aféngona aféfuena uícodo daña uai, afengo iere ñue ínoteza. Afengo bie izói daide: Bímie ie daña uaina jáíifo méidofinidimie.

12 Iemona Abraham iere jónaite íadi, iere aillo erófene igímaiaina jebuítate. Ua jamánomo diga nairai jebuide; nñ ja lloga monamo ite facádonide

úcuai izói itíai. Nane monáillai fuédamo ite facádonide guamai izói jebuídiai.

13 Nana cai lloga comini Juzíñamuimo nai íai. Inoina llezica tídiai; nana Juzíñamui uícodo lloga ñúefuiaina nai llinoñediai, tílla. Mei íadi afe lloga ñúefuiái ico jáiruimo zúillena jicana fidídiai. Fídiano caimare aféfuemo inuano comécidiai, mei biniemo ónoñega jicánemacina íai illa raire méaicaiñeno llotíaiza. Uáfuenta biniendo jaiánicana jáidiai.

14 Nana daí llotino, dani íai nahí illinomo íai jáiacanana llotíai. Ua jáie éniemo jáillana íai úinoinana caina fidítate.

15 Daí íai dainamona, mei nibai jai íai illániemo comécidiai. Daí íai coméciadi diga icaiño meine abido afénono jáirediai. Mei íadi abido afénono jáiñediai.

16 Mei jáinomo comécidiai. Jáie jamánomo ñuera illánomo, monamo ite Juzíñamuimo nabáirizaillinomo izire úiñoidiai. Daí Juzíñamuimo íai inuamona, Juzíñamui iere ióbite. Bie jaiánicana jáidino Juzíñamuina dáidi: “O cue Juzíñamuidio,” daí íai dainari Juzíñamui méaicaiñede. Mei íai jofue izoide ñuera illino, dinomo Juzíñamui diga zíñona nabáirizaillena, Juzíñamui jae finócaza.

17-18 Naui Isaac jocoina llezica Juzíñamui Abrahana daide:

“O úicoitigima bie jitó Isáacimona aillo jébutiaiza,” daide. Diga iruillai íllamona Juzíñamui dáaruimo Abrahana inuafue facátate. Iemo Juzíñamui ocuilla izói, Abraham nai

Juzíñamuimo izire ínuano, ie jító oni uite, títada Juzíñamuimo fecállena.

19 Mei Abraham Juzíñamuimo ñue ínuano comeci facade: “Juzíñamui jamánomo ñue ríinoredimie; tíide come meine cáataite ríino íemo ite. Cue jító tíidena Juzíñamui meine íena cáatarede,” daí Abraham comeci anado daide. Iemo, Abraham ie jítóna fáiacana llezica Juzíñamui aféniemo raire úrillano, ie daade jítóna jíllotate. Abraham ie jítóna fañede. Ie jira jíáifodo daírede, tíllanomona Abraham ie jítóna meine abido ote.

20 Daje izói Juzíñamuimo ínuamona Isaac ie jító íaillinoi Jacóbomo Esaú diga uire Juzíñamui orelle caimátaillifue ua llote.

21 Daje izói Juzíñamuimo ínuamona Jacob, ie tíizailliruimo José jító íaillinoimo úrite. Urillano ie enaize íaillinoimo uire Juzíñamui orelle caimátaillifue jino llote. Afe llezica ie macara jigüida llínota ie abi mozíñuano caimare Juzíñamuimo úrite, ie íóbitallena.

22 Daje izói Juzíñamuimo ínuamona José ie tíizaillirui ánozillano, Israel comini Egipto éniemona uire oni dani íaioi éniemo jáillifue llote. Afe llezica ie ícuruai aféniemo fiéñeno oni úillena, uícodo uai íaioimo jóonete.

23 Diga fimona jailla mei, Egipto ríillaima nana Israel como jéciga jítótiana fazítate. Mei íadi Moisés jocoina mei, ie moo íaillinoi Juzíñamuimo ínuamona, illáimana jacíruíñeno Moisená retáidotiaillinoi. Dauíamani íena retáidotiaillinoi, afeza iere ñúezana jira.

24 Aféllaïma jiza Moisená nãamataja mei, Moisés móonaila llezica Moisés aféngomo dúillana ruifruite; mei afémie Juzíñamui dibénemo jaináideza. Ie jira Juzíñamuimo ñnuamona Moisés afe mámeçi oni faite.

25 Mei jiáifodo Juzíñamuimo jaináidino cígiri ñllana, afémie jamánomo gaide, nana duere zefuïdiaioi íadi. Daje izói ie comínina fieni ie zóofiamona raire féite jabo ióbillafue dibénemo ñllana afémie gáñede. Moisés Juzíñamuimo ñnuano ñue coméçide.

26 Bíedo afémie coméçide: “Nana Egipto énie ebírede ráaniai baïmo, Juzíñamui dibénemo ie dámie illa jamánomo ráifide, duere afémie zefuide íadi.” Afémie daí comeci facade. Ua Moisés, Cristo ícoïnía zefuïllano, féitañeno daí coméçioifirede; mei Juzíñamuimo ñnuamona baïmo ñuera féinide raa izóidifue afe ie jirídollena afémie onódeza.

27 Iemona Moisés Juzíñamuimo ñnuamona, afe Egipto illáimamo ite ríinona jacíruiñeno Egíptomona botade. Ua jacíruiñeno afe Moisés oni jaide, mei buna cióñena Juzíñamuimo fáicanocaiñeno ñue nágarui coméçifiredeza. Daí ie coméçinamona, úido ciónamiemo ñnua izói, Moisés Juzíñamuimo iere ñnote.

28 Daje izói Moisés Juzíñamuimo ñnuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jofóniaï naze fuédamo oveja díena jíritate. Daí finuamona, Juzíñamui oreca títaite abi ímie nana Israel nano fueñe jococa jitótiaiaïmona buna titáñede, aillo

Egipto imaci jitótiai tícoizitiaioi íadi.

²⁹ Daje izói Juzíñamuimo ínuamona nana Israel aillo comini “Jíairede” daina monáillai ñue zaférede iodo ruícafenemo jaitádiaioi, mei afe monáillai jainoi Juzíñamui oni gaitácaza, íaioi ruica jáillio tuíñóllena. Mei íadi Egiptomona racádino afémaci jailla izói jáidiaioimo, meine io jáinoina íbáibicaillari coróbaitiaioi.

³⁰ Iemo Israel comini Jericó jofue anáfenoacadiaioi. Afe jofue riire naidároga nofíbanina cirínoga. Iemo Juzíñamuimo ínuamona ie daina izói, siete dígarui afe riire íbaica jofue jinófenedo ífoina macáoidiaioi. Iemona ícoi iruimo afe caifo nitaca nofici fínoina jofue jinófene cirínuabani, Juzíñamui ana éniemo caitade.

³¹ Daje izói Juzíñamuimo ínuamona nauí uícodo fiénidíngo, Rahab fañega, nana jíáie afe jófuego ite ínoñedíno fazícaicioi íadi; mei Juzíñamui comínimona oreca éniena ñue onóllena méiñoitinona afengo caimare cánuano jofu uáidoteza.

³² Nai jino lloñega aillo ite jíáie jaii Juzíñamuimo ínofiredíno. Bibedo íaioi illáfuiaina cue llóllena cue abi juánideza, nana llónidícue. Fia íaioi mámeCIAI jino llóitícue, íaioimo omoi ñue comécioillena. Afémaci Gedeón, Barac, Sansón, Jefe, David, Samuel; daje izói Juzíñamui uai jino llóraini ite.

³³ Bimácimona dámerie Juzíñamuimo ínuamona jíáie náiraina anáfenodiaioi. Jíáimaci Juzíñamuimo ínuano Juzíñamui jáicina jóidífueña comínimo ocuide. Dáerie Juzíñamuimo ínuamona

ie uícodo llua izói, Juzíñamui canócaiaioi. Dáarie Juzíñamuimo ínuamona riírede jánallarillai fuenta ibaica izói finode, íena íaioi ríñeillena.

³⁴ Jiáimaci uzírede iraimo dotácaiaioi ia, nai Juzíñamuimo íaioi ínuado afe iráimona uzíñeno jino bitíaioi. Dáarie Juzíñamuimo ínuamona fuiríllafuiaimona otábiñeno jino ñue jíllodiaioi. Iemo jóbairo illa llezica Juzíñamuimo ínuamona dáarie maíriñedimíai ñue márimíaina jaide. Daií Juzíñamuimo ínuamona onina bite fuirírainina abido rainódiaioi.

³⁵ Daje izói Juzíñamuimo ínuamona dáarie ringóniaimona íaioi úruiaí tíide íadi, meine abido íaioimo cáataga.

Mei íadi jiáimaci nai Juzíñamuimo ínua llezica, íbátarede tíide jíllotafuena lloñédiaioi, mei aféfuedo Juzíñamuina jáanotaiticai, daidíaioi, íadi Juzíñamuina jáanotanidiaioi. Ie jira iere duere zefuitano titácaiaioi. Daiítadena lloñédiaioi; mei afémaci meine abido caana mei, jamánomo ñuera ziiñona illáfuenta méaicaiñeno maíñóacadiaioiza.

³⁶ Nai jiáimaci Juzíñamuimo ínua llezica, fiénide zánonafuiaimona duere finóbidiaioi. Jiáimaci riire zechénogaiaioi. Ua dáarie Juzíñamuimo íaioi ínuamona cúinajano llavécaiaioi.

³⁷ Daje izói jiáie Juzíñamuimo ínotino noficiaina níjicaiaioi; jiáimaci dáafemíaido amena dera izóidedo ñetácaiaioi; jiáimaci caimare taino uáillaido bífuegaiaioi, íaioi ínuafue facátallena, íemo lloéfaido fagáiaioi. Jiáie Juzíñamuimo ínotino, íaioi iníroinina jira, tóica rille igórainna jítáoidiaioi.

Daí fia macáoidiaioi, mei jofónidiaioiza. Ua iere ráanidiaioiza. Ie emódomo duere zefuítano iere fieri finócaiaioi.

³⁸ Daí finócaiaioi íadi, Juzíñamuimo íaioi íinogafuena fáicanocaiñediaioi. Iemona bimaci Juzíñamui dibénemo iere izíruigano; mei íadi bíniemo ite ínoñedino afe Juzíñamui uaina jeire otínona jámairuitiaioi. Ie jira ínotino afe ínoñedimaci cigiri íllena, ínoñedimacimo figo dúíñede, mei ínoñedimaci comeci iere íáiredeza. Ínotinona jámairuillano, íaioina oni jiúfirediaioi. Iemona ínotinomona dáamierie zaféredizicimo jáidiaioi. Jáíimaci caifóneduai illánomo botádiaioi. Íaioi jaillánomo ite ífuaimo ífirediaioi, naa íduai ana ífuairi.

³⁹ Nana bimaci Juzíñamuimo ínuamona, ñue “figora” dainámacina jáidiaioi. Mei íadi nana Juzíñamui uícodo lloga caimare ñue illífuiaina figo maiñóñediaioi; jabo maiñódiaioi.

⁴⁰ Mei Juzíñamui jae uícodo cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jílloillifue. Daí jaiái ua Juzíñamuimo ínotino naa cai diga, birui dáanomo jaiái Juzíñamui mameca nahí jílloillifuemo dúciiticaí. Ua afémaci naa cai diga, Juzíñamuimo caimare nabáirillafuena jeire óiticaí.

12

Jesumo ñue jaícina omoi comécioiri

¹ Ie jira, cue ámatiaí, comécido ñue omoi facari. Ua aillo jamánomo Juzíñamuimo izire

ñnotino bíniemo cai uícodo macáoidiaioi. Afémaci Juzíñamui cai ióbitallifuena caina ifode. Afémaci cai ñnogafuemo jaícina ífoite uai nabáiraini. Cai abido ífoina itíaioi. Afémacimo cai comécíillamona, nana cai jízítacana uite fiénidifuiái mai oni cai féitalli. Ua, caimo ite fiénidifue, abi llótaidote iniroi izói caimo jíide. Jíinamona jaca caina aruire itátate. Afena fáicanocaillano, Juzíñamui ióbitallifuemo zefuíruíñeno mai izire cai nícidolli.

² Afe llezica duere cai zefuállano féitano, mai Jesumo comeci cai facalli; mei afémie Juzíñamui ióbitallido, ñnuafuedo cai jáillena cai ífódímieza. Mei afémie ie Moo Juzíñamuina féitañeno ie fáainaruimo nai íemo izire ñnoide. Daií ie ñnuu, afémie izói jaícina cai ñnollena, afémie cai ifode. Iemona afémie cai ñnogafue ñue ícoimo fuitádimie. Ua, Jesús duere zefuide, íadi afe duere zéfuilla méifomo íite cáimafuemo, afémie ñue comécíide. Afemo comécíioillano uái daíi cruzmo tíizaide; mei áfedo nana íemo ñnotino caimare jíllobicaítiaioiza, afémie onode. Iemo afe meáirede tíillana náfueñeno, abido meine cáadímiena jaide. Afe daíi jaillano caífo Juzíñamui nabézimo Jesús ráinazaide.

³ Ie jira, cai jíáinona duere zefuítagamie Jesumo mai ñue omoi comécíioiri, omoi duere finóbicaillamona omoi zéfuiruíñeilla. Daje izói Jesumo ñue omoi uibíoiri omoi comeci ñue náireilla. Mei afémie fáicanocaiñeno Juzíñamuimo ñnoicaide, fiénidino íena uáitajano duere ie finódiaioi íadi.

⁴ Fiénidifue omoi comécina jíirioide, íadi

nágarui áfemona abi ráiruifirediomoí. Afemona abi rairuállano iere juárede. Iemona jabo duere finócaomoí. Mei íadi fiénidifuenta omoí anáfenoacanamona nai tíñediomoí. Dama Jesús ícoinia jabo duere zefuídíomoí.

⁵ Afe llezica Juzíñamui caimare llogáuaina nibai jae féitadiomoí. Aféuaido Juzíñamui ie úruiaí izóí, ómoína llófuete; ona riire daide:

“Cue jitó, o Ocuíraima Juzíñamui omo oreca duere zefuítajafuenta jámairuiñeno iri, mei áfedo afémie ñue ona rairuállano lletádeza.

Daje izóí fiéni o finuamona afémie duere o finóadi, comécina ríinidimie izóí iñeno iri.

Mei jáífodo, abi mámano, ie lletafuenta ñue jeire oíri, ñuemiena o jáilleza.

⁶ Mei Ocuíraima Juzíñamui nana ie izíruiganona fáicana lletáfiredeza, íaifuenidinona íaioí jáillena.

Afe izóí nana ie ua onoiga jitótiaína llorebai mailla izóí due ízitate, mei afémaci dama íeieza,” daide.

⁷ Omoína izíruillamona Juzíñamui afe daií ómoína duere zefuítate, ómoímo llófuellena, baimo ñuera ie jitótiaína omoí jáillena. Ie jira duere zefuítagaomoí. Mei onódiomoíza, bíniemo ite moo lletañega jitó ñue móonaiñeiteza. Iemona afe moo nana ie jitótiaína llorebai mailla izóí ízitate.

⁸ Ie jira Juzíñamui ízitañegamie nibai ie nahí jitóñedeza, móonidíza; mei nana nahí ie jitótiaí izi cácatagaiaíoíza.

⁹⁻¹⁰ Afe emódomo cai bíniemo ite móotiaí nauí ñue cai móonaillena, ñue comeci íaioí fácamona, izire caína lletádiaíoí. Ua nano íanori illáruillaido caína

duere fínuafuedo lletádiaioi. Ua izi cácatagacai. Afe llezica nai cai moona caimare jacíruiticai; jacíruiouillano ñue íaioi anamo itábicaidicai. Daje izói cai monamo ite Moo anamo jamánomo caimare itábicairedicai; mei afémiemo cai ínuano, nahí ie jitótiaina comuítagacaiza. Nana aféme duere cai fínuafue cai dibénemo aillo ráifide, aféme ebire ñuera illa izói, daje izói cai illena.

¹¹ Ua, ja onódiomoiza nana izi cácatafuemo illa llezica, áfena gáíñedicai. Mei íadi afe izi cácatafue záilla mei, áfedo lletácana, Juzíñamui anamo ñue jaícina íficaillano, comécina jacíruiñedinona caimare jáiticaí.

Juzíñamui uaina ruifruilla tere jacírede

¹² Juzíñamui daí omoi llétajana omoi onónamona, mai abí omoi mame. Ja abina náinidino izói omoi iñeno iri. Omoi zúurede comeci náiretari.

¹³ Afe llezica omoi duere zefuúllafuemo, mai bífuemo jaícina comeci facádori. Aféfuemo daíri “Juzíñamui íóbille jitótiaina móonaitagacai.” Daí o dáinamona, jáie ómoimona Jesumo ínogana féitaacadino, comécina caimare náiretaitio. Daí ie náireillamona aféme meine abido Jesús uaina izire ínocana jeire óite.

¹⁴ Afe emódomo nana comíni cígiri, mai comeci ríicaitañeno cáimafuemo omoi iri. Daje llezica, Juzíñamui ebire ñue illa izói, afe dibénemo mai omoi abí ífuiái nágarui méidocana uiri. Bie izóidifuemo omoi nai iñeniadi jaca buna Juzíñamuina cíóñeille. Mei íadi comeci íaininafuemo cai íadi, íena cíoiticai.

15 Juziñamui caimo fecaca cai ie cánuafue aillo ite. Bifue nana jeire omoi ófireilleza izire omoi coméciri. Dai íllamona buna fiénidifue mo oni nibéfodo báiiñeiteza. Daa daií oni fiénidifue dibénemo baídimie nana jiáimaci comécina fieni finode. Mei jii, duere zefuállamona Cristo dibénemo figo jaináiacañedimie, jucúrede juia izoide. Mei afe juia illemo totáa, nana áfeji jucúredijina jaide. Daiítade come nana ie aino comínina daje izói figóruiñede. Afemona abí omoi rairuiri.

16 Daje izói nana jiruírenafuiaimona abí omoi rairuiri. Afe llezica ómoimona dámie Esaú illa izói iñeno iri, mei afe Esaú jaca Juziñamui jítainafue mo figo coméciiñedeza. Aféfuena jámairuillano, afémie nánoramie íadi, íemo ite maiñórrille ríino, fia due jiza güille ibana fecade.

17 Afe Esaú illáfueña ñue onódiomoiza; mai aféfuemo omoi comécioiri. Ico írairuimo ie moo ézirafueña Esaú maiñóacade, íadi ie moo ja íena ruiífriute. Afémie comeci ifue méiduano éecana ie moomo izire jicade; íadi “Jii” daiíñede. Afe nauí Esaú jámairuillafue jaca méidonide.

18 Ja birui Juziñamuimo caimare nabáirillanomo dúcidio moi. Jaiái Juziñamui comíni áillue caifónedumo áinozidiaíoi, Juziñamui daina uaina cacáillena. Afedu mámeçi Sinaí. Afedu náaduña irai izói boode, aillo uíllie diga. Afe llezica iere jacire nairíbicaide. Nairíbicaillano, jairifo ríire jaiñode.

19 Aféruimo bainada izoide ficire cácaide. Afe llezica áillue come úrilla uai íaioimo ficire cácaide. Afe uai iere jacírede cacaide. Afemona, áfena cacáđino jiáie emódomo lletara uaina llóñellena izire jicádiaíoi.

20 Afe íaioi cacana íaioimo lloga lletara uai jamánomo iere juáredeza. Aféuai daide:

“Bie óode íduna omoi jetáñeno iri. Ninena daa rille bídumo bíadi, raire nofíciado fáiri. Daje izói ninena bídumo bite come fáiri,” daide.

21 Uafue, afe cacánafue naa cíocaidifue diga iere jacírenamona, dama Moisés uai ua: “Aferi iere jacínaitícue. Jacíruillano cuidíritícue,” daide.

22 Mei íadi, jae jíáifodo Jesucrístomo omoi íinuamona, ja birui Juzíñamuimo ite jacínide caimare nabáirillafue dibénemo dúcidíomoi. Ie mei ícoimo monamo ite jaca caade Juzíñamui uícomo úrizaitíomoi. Juzíñamui illa jofue, “mona ero ie Jerusalén” mámecirede. Iemo jíáifodo “Sión Caifónedu” daina. Afémiemo ja omoi caimare nabáirillamona diga íeza facádonide Juzíñamui abí imaci Juzíñamuina íóbioicana íráízitiaioi.

23 Ua, omoi íinuamona Juzíñamui ómoína daide: “Ja cue daade Jitó Jesucristo izóidinodíomoi. Cuemo ie dúina izói, afe izói ja cuemo jaináidíomoi,” daide. Afemona nana Juzíñamui íena comuítagamacimo jae jaináidíomoi. Nana afe íemo jaináidíno mámecíai jae monamo cuega. Ie jira nana Moo Juzíñamui ie comuítaganona, ñue jicánuana fibídímie izói, ñue íaioina ríidoite, mei afémie nana nairaí Mooza. Jaiái ie anamo ñue itino, jae tíidiaioi, mei íadi íaioi ñuera joreño naí figo caimare íñédiaioi. Ja biruíllaido Cristo cairi tíillano caina jíllotate. Daí nana íemo ínotinona jíllotano, afe tíidíno ñuera joréñuai ñue jaícina caimare itátagaiaioi.

24 Uafue, Juzíñamui comue caimare caimo fecállifue caimo lloíacade. Afefue caimo lluaíbitimie Jesús, mei ie cruzmo ie die tótajado caimare íaifuenidinona finócacaiza. Ie jira ie die, úrilla uai izói jamánomo ñúefue cai ifócimo denode. Mei jáífodo Abel die tóilla afe izói caimare ñúefuai caimo lloñede.

25 Nana bie caimare Juzíñamui caimo llotátagafuiaina jae onódiomoi. Afena omoi onónamona, afefue ómoimo llotímie mai omoi ruifíruíñeno iri. Afe íena ruifíruillamona abí omoi rairuri. Mei jaiái bíníemo Juzíñamui jóonega lletárama dáinana ruifíruitino, duere íaioi finóinamona jaca jíllonediaioi. Afe baímo birui monámona caimo llotímie dáinana cai ruifíruíadi, daje izói ua jíllonéiticaí.

26 Jaiái aféruimo ie úrilla uai éniena diga icaiño riire docáitate. Mei íadi birui afémie uafue llote: “Nane afe emódomo dáacaiño éniena riire docáitaiticue, naa caífo ite monáiaíri,” daide.

27 Afémie dáina “Nane afe emódomo éniena dáacaiño docáitaiticue” Juzíñamui íraíruillaído finóllifue caina daide. Aféruimo nana ie finoca raa, ranítado izírilla izói níraídoite. Afe níraíduado nana níraírede ráaniaína, afémie oni niné tánocaitaite. Mei íadi níraínide ráaniaí jaca méidonide; fiébillano zííñona íitiaioi.

28 Ja birui Juzíñamui méidonide illáimana illánomo jaináitagacai. Iemona íena “fere figura” cai daíífireilli. Afe llezica caimare úrillafuedo mai íemo cai íóbilli. Ua, ñue jacíruioicana ie uáillaímo mai ñue cai cacáreilli.

29 Mei jíi, cai Juzíñamui, irai amena cuarilla izói, nana íaífueredinona jaca zííñona íaioína duere

fínoite.

13

¿Nie izói Juzíñamuina ióbitaredicai?

¹ Amatiai, mai conímána omoí izíruifireiri.

² Daje izói onina bitínona mai dúecaillano ñue caimare uáidori, mei daíí dáríe jíáimana íaíoi caimare uáidofirenámona ónonino Juzíñamui abí ímíaiána jofo llíinotiaíoi.

³ Iemo Jesumo ínuamona llavécamacimo ñue omoí úbicairi. Ua dájena llavécano izói, mai íaíoi mo comeci omoí facari, íaíoi na omoí canóllena. Daje izói duere finoca Jesumo jaináidímacimo, mai omoí ñue coméciiri, mei daní omoí abína jíáimaci duere zefuítarede; íemo bimaci diga daíí zéfuitiomoíza. (Dámacidiomoíza.)

⁴ Daa come daje ringona áireia ñuera. Afémie dama ie ai abína onona ñuera. Íima dama ie ai jeta ñuera. Mai bifue íáiñeno ñue omoí fímairi. Mei Juzíñamui nana jiruíredínona izire jicánuano íaíoi na duere fínoiteza, naa dama áireiñeno ringo diga itínori.

⁵ Daje izói omoí comeci ífúena ñue onoiri. Ucubena aillo jitailla fiénide. Afemona abí omoí rairuiri. Mei jíáífodo ómoí mo due jiza ite ráaniairi júfidoñeno caimare uái iri, mei Juzíñamui uafue dáideza: “Ona fáicanocaiñeitícue. Daje izói jaca ona zóofeñeitícue,” daide.

⁶ Iemona minícana jizíreñeno daííredicai: “Juzíñamui cuena canófiredímie; íemona fieni cue finóacadimíena jáciruiñeitícue.”

7 Iemo mai Juzíñamui uai ómoimo nano fueñe jino llófuetinomo ñue omoi uibíoiri, mei ñúeodo ómoína ifódiaioiza. Iaiomona comuide ñúefuiaimo, féitañeno mai ñue omoi comécioiri. Afémaci Jesús ícoinia titácaiaioi, mei íadi afémaci fáicanocaiñeno Jesumo ínua izói, afe izói féitañeno mai omoi ñnofireiri.

8 Mei ji, Jesucristo nanómona ie illa izói, ja birui jiáfodo méidoñeno dáamieoicaide. Ua afémie jaca ziiñona dáamieite.

9 Ja birui diga jiáfodo cacaide onina bite ónoñega fieni llófueinafuiái ite. Aféfuiai ñúeomona oni nibéfodo omoi baiítaiacadeza; áfemona abí omoi rairuiri. Juzíñamui cairi dúecaillano cai cánuano cai comeci náirecaitate. Afe ie cai comeci náiretaja ñuera. Mei íadi afe jicana lluáibiga güille rairuínafuiaina jeire cai óiadi, caina ñue cánoñeite. Daje izói afe uai jeire otínona canóñede.

10 Jesucristo cai ifomo fécafue Juzíñamuimo caimare cai nabáirillena dani caimo dúide. Nana Judíuaido Juzíñamuimo úriraini, ie jaiái gairíracomo aillo Juzíñamuimo áinozille nícidogafuiái finódiaioi. Mei íadi afémaci Jesús dibénemo ite cáimafuiaina llínonidiaioi.

11 Judíuaimona comínido Juzíñamuimo úritillaíma dáacaiño naga fimona afe faga rille die Juzíñamui icomo uite. Afe Juzíñamui icomo ite jofoidé ñue rairuícacomo comini íaifue ícoinia díena uite. Mei íadi afe faga rille, comini illácuai jinomo jobáifrediaioi.

12 Afe izói Jesús Jerusalén jinomo duere zefuide, dama ie die tóillado nana comini fiénidífue oni

dóllena. Daií duano íaiõina Juzíñamui éna mamede.

¹³ Ie jira nana Judíuai Juzíñamuimo áinozille nícidogafuiaina féitajano, mai dama Jesumo jaca cai ínolli. Ua, daií íemo caimare cai jáinainamona jílloitícai. Ie meáire duere zéfuilla izóí, duere cai ze-fuíadi, áfena náfueñeno nai caimare íemo jáinaitícai.

¹⁴ Ja bíniemo ñuera méidoñega illano caimo iñede; mei íadi Juzíñamui finoca monamo ite méidonide cai illínomo izire úiñoidícai, caimare zíñona ie diga cai nabáirizaillena.

¹⁵ Iemo, Jesús caido Juzíñamuimo nahí úriraimana íllamona, mai Jesudo nágaruillai Juzíñamuimo ñúfue cai nitalli. Ua, cai fuemo ite uaido Juzíñamuina caimátaitaredícai. Cai Ocuíraima Jesús mámeçido cai úriadi, jaca Juzíñamuina ebire íóbitaredícai.

¹⁶ Daje izóí nágarui jáima canolle ñúfue jeire o úana, mai féitañeno iri. Aféruido jitáidinomo ómoimo ite raana jeruíñeno fecari; mei aféfuiaina Juzíñamui iere íóbideza.

¹⁷ Omoí illaini llogáuaimo ñue omoí cacáreiri. Aféuai anamo ñue omoí itábicaíri; mei omoí comeci ñue íllena aféllaini nágarui ómoína rairuífrediaíõiza. Ua aféllaini ómoína rairuilla nie izóí íadi, afémaci Juzíñamuimo jino llórediaíõí. Ie jira íaiõí táijnana omoí daídóñeno iri; mei jáífodo ñue íaiõí anamo omoí itábicaíri. Afedo aféllaini Juzíñamui ocuica táijnana caimare fínoite. Mei íadi afémaci afe táijnana zúurecana finóadi, figo cánofegaomõí.

¹⁸ Mai birui caido Juzíñamuimo omoí úriri, afe Juzíñamui cai canólleza, mei cai comeci ifue íáinideza. Mei jii, nágaruillai náganuiaimo illa

dígamié íaioi eróicana ñue jaícina fígomiéna íacadiçai.

¹⁹ Ua, cuedo Juzíñamuimo comécido omoi úrillena izire jicádíçue, raire meine abido omoi cígimo Juzíñamui cue orélleza.

Iraicaiño uáidota ñue ézicínocaillafue

²⁰ Ja birui Juzíñamui ñue omoi ézicillena jicádíçue; Moo Juzíñamui, comécina uái illafue comínimo féçaitimie. Iemona çai Oçuíraíma Jesuna tíllanomona Juzíñamui meine abido cáatate, mei Jesús ie die tóillado nana çaimo ite fiénidifuiaina muiñoçeza. Múíñuano zíiñona Juzíñamuimo çai nabáirillafue cáiena mamede. Ua, Jesús jamánomo ñuera ovejai úiñoraíma izoide. Afémie ovejai rairuilla izói, çaina úiñoçirede, comécina uái çai íllena.

²¹ Afe bie Juzíñamuimo omoi comeci náireillena jicádíçue. Ua nana ie ñuera ríinodo omoi coméçaina ñue jaícina çaimare náireillena jicádíçue. Afe bie cue jicácado ie jítáinaçuaena ñue comíni eróicana fínoitiomoi. Afe llezica Juzíñamui comeci óiacana izói daní çaimo zúillena izire íemo jicádíçue. Mei daí çamánomo ebírenafue Jesucríçtomo, ninomo fúíñeítina nitáredicaíza. Mai, daí íteza.

²² Amatíai, nana bie ómoímo cue çuega lletáraçuiamo járitaño fia omoi coméçiri. Afena izire ómoíena jicádíçue, mei bie ómoímo cue çueçáuai íanorideza.

²³ Iemo jáíçuaena ómoímo fidítaacadíçue. Jae çai ama Timoteo llavéinanomona jae çino çuitaca.

Omoĩ dine nai jáiñeiticuemo, afémie cue illánomo raire dúciadi, nibai daane omoĩ éroizaibiticoco.

²⁴ Nana omoĩ llófuete illáinina cuedo ñue uáidori, naa afénomo ite Jesumo ínotinori. Itáliamona benomo cai bite ámatiai ómoimo uallai orédiaiOi.

²⁵ Juzíñamui nana ñue omoĩ íllena ñue éziciteza. Mai.

Daiítadeza. Jae ñie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
740f11a2-2e26-57f5-a3a7-5deb2d20bd24